

清容居士集

三

化園書館

Wahwa Library

開化圖書館

Kaithua Library

開化圖書館

Kaithua library

開化圖書館

Kaichua library

清容居士集卷第四

古詩五言

夕佳亭

赤雲下平田層巒紫光凝
踈鐘息萬籟晴湖淨奩冰
倦翻戢已棲遊雲澹相承
吹簫者誰子空林起孤燈
感彼金谷人怪石樛寒藤
壯意耻未没水涌風憑陵
亭亭玉浮圖百幻隨廢興
振衣視天末黯澹銀河升
朝曛詎異境氣寂念始澄

贈養源編脩回嚴陵省墓

峇峇白雲阡翳翳青松居美蔭同靈根地
易世愈踈清秋子胥濤縈紆達桐廬欲濟
非無航契闊實跂予昔聞祖父言結綬來
京都束書遠鄉國井邑匪異殊俯仰成雲
仍宰木今何如事遠遺謀存審象窺眉鬚
寒暑有代謝念昔同一初躬耕樂真隱漫
仕脩素儒敦叙古所宗和侃寧有渝

贈昌上人二首

蕭蕭湖上波搖蕩群峰秋客有萬古意支
筇赴龍湫龍湫尾眉叟宴坐足未收飲以

一片冰熱視了不酬長松挂枯瓢風靜林
颼颼境足念愈忘道充身益優永謝巖下
人深省聊自脩

岩堯蒼玉軒虛聲振寒林我昔行其庭見
影復見心秀嶂出古色浮雲為之陰豈不
念世短所樂非所歆潜珍闕幽匱群弄誇
姝音靖言事當爾江湖眇崎崆送子歸山
阿松風起寒琴

宿竹院次珙橫川韻二首

脩竹手所種參差過屋山微風為之來心

境兩相閑清泉在澗底白雲在松間鐘聲
集趺坐樓深流月殘重遊啓深省解轡思
掩關

昔遊玉几峰老禪肩如山機深削陳迹天
馬初朕閑念欲從之遊小築茅三間俛仰
二十載黃塵鬢毛殘亭亭石塔影哀猿守
松關

送宋壽卿侍御迎養建康

葆真林間下為善心自娛農圃得休息時
讀古人書施食不望報折券不顧餘時至

祿自臻門有駟馬車念昔鬢齒子遶床衣
青襦束髮事編簡操觚入皇都勁氣摩黃
鵠危言伏青蒲尾眉笑有言鄰曲驚且吁
維南帝王州問俗宣典謨匪規鼎食榮菽
水心晏如種德報已豐願言廣蓄畚蘭生
在堂下深根佇扶踈

廣信陳氏擇勝樓

散髮碧潭際讀書叢竹邊怡情學榮觀卜
築遵自然雲蘿左右嶂雞犬東西阡群動
各有性孰念靜者憐翳翳昔賢居遺迹故

老傳化為神僊宅喬木暎蒼煙松風起萬
壑哀湍助鳴絃觀萬詎在遠泯默師韋編
潘孟陽上書不報歸里作五詠

賈生蘊竒略徒步西上書昊天有正命傷
哉杞人愚鵬翼垂雲來魂氣與之俱鼂氏
竟寂寂主父復何如

襄陽孟處士拂衣歸故山放浪巖壑深流
詠遺人間舉袖巖花落擊楫江鷗還羊公
何墮淚水聲日潺潺

梅生一尉卑喋喋正天紀洗心洞玄化削

跡棄妻子龍變孰能馴蟬蛻迺真止松迴
風泠泠水落石齒齒
虞卿舌轉丸揣事精微芒事危見交態窮
愁名益光黃金散逝水白壁凝飛霜丈夫
有定志得失非預防
仲連匡世姿揮手却秦軍掩袂停白日登
車抗浮雲射書誠草草孤城生死分辭榮
敦薄俗矯抗離其群

題盧溝煙雨圖

為吳成季作

驅馬上河梁圓暈新雨紋矯首層闕巍翔

鸞散竒氛倚南雙松樹百里風聲聞束髮
入紫京去住心如焚送客酌我觴我酌不
得醺願化為黃鶴朝夕隨飛雲上以奉明
主中以承嚴君徃復三千年竒齡合氤氲
結袂安期子啓齒歌瓊文

滑州從事持喪三年將終養其母

郡表其閭

東魯秉周禮化俗何簡媮崎嶇小滕君冠
蓋交道周漢帝仁且明遺令誠咿嚶駟馬
不及舌坐貽千古羞濫觴始膚寸奔流淪

九州昂昂古先進免胄希前脩青松為之
枯慈烏為之留念此歲月短解紱安林丘
華楹表槐柳細石寒泉流泯默區中人章
甫慙沐猴

孟和鄉旌表

濯纓息機事枕石聽流泉感彼蟻慕人駢
首爭遺糴黃雲翳平壑持以防歲年河流
滔天來積浪翻中田招携舊鄰曲寒林起
炊煙冥報非我願表宅增惘然紛紛游俠
徒黃金生愛憐原生處蓬戶屢空聊自全

雲中郝孝子

混沌鑿既久重華以孝稱悲哉短喪徒稻
錦顏益矜詩禮行中州衆說交沸騰挽十
不得一閉閣徒凌兢芒芒古雲中土屋塗
層冰下有郝氏阡馴烏為之增大圭出至
璞匪以雕績能寒泉冽古井零露溥蒼藤
溥風詎云遠相傳在雲仍

送沙君寶宰邑

舊為翰
苑印史

尚印宰百里寒厓水粼粼野曠牛羊低山
深麋鹿馴持觴接耆老種柳迎行人陶然

樂清淨絃歌足青春

次韻馬伯庸供奉書館書事二首

瑤臺麗層雲秋聲起琪樹織翠藻井波凝
碧瑣窻霧雍容列僊集晴雪烟振鷺念昔
經啓初擲沐合生聚簡冊迄未成春秋奉
神御巍巍冠函夏握筆慙繪句玄尊實明
水越席敷大路崔蔡心匪迂終焉才名誤

其二

神京奉載筆需雲歌肆筵匪謂歲月虛聖
代深養賢微踪愧三入取禾踰十千馳神

竹素圃鴻藻儼古先群雄寶書聚彌綸迺
成編微言耿玉絜潛光媚春妍往聖去已
久八音盪敷宣元運合豹變高閔踵蟬聯
夷齊迺首傳冥思豈其然

送馬伯庸御史奉使河西

青瑣倦迂散執轡踰關河黃流何奔傾積
石何嵯峨承詔撫疲甍驚鳥在林柯沙
場有凍骨野畝無遺禾日夕寒雲聚宿憐
明巖阿訪俗感素心因之聆詠歌
詠歌者誰子被髮號天明婦死不復悲失

兒誰與耕承平五十載不識戰與爭殘雪
流銀液我淚同其傾古云百二險夸誕生
甲兵孰能轉夷途歷劫永清寧

清寧闡文運覽彼古帝都秦聲激豪宕洛
詠夸敷腴邛山何纍纍下有白玉跌感彼
秉筆人百金盡其諛死者已寂歷茲文亦
模糊偉哉龍門生悲憤有遺書

遺書紀河源荒忽不可識君行河之西春
雪深五尺茫茫賀蘭山抽矢石為鏞坐閱
三姓王聖代始歛色沙羊護氈房名駝候

土驛觀風慘無傳雲端羨飛翼

飛翼西北來遺我書赫蹠中有陳情詞復
憐雙雛啼野曠川無梁積荒氣候淒雞鳴
葡萄根虎嘯首蒼畦清霜集素裘斗戴天
益低頓轡不得上雪山在其西

其西何寥寥云有古先生巖居時一食委
形澹無營朝日炫丹碧匪以斤斧成如何
驕榮子騰擊列層城驅力超北海逐影徒
南溟誰能佐玄化泯默有遺情
遺情在相思舉酒不得起永念編簡功篤

志刊綺靡傾蓋已云舊知我實知己送君
河之湄凍柳光疑疑脩途馬飛翻少立盡
瞻俟植德綏令名眠食慎道里

道里吾何能託身承明廬
峩冠養深拙清塵避脩途
驅馬李陵臺望鄉問長鬚
長鬚不能對吾行益次且
羨君萬里道晴霞起
襜褕天山諒非遠
椎牛植粉榆

月巖

峻壁飛鳥絕積鐵成臺隍
感彼玉兔精皎皎芙蓉床
萬古消晦冥六月生陰涼
道人

悟空幻趺坐鬚眉蒼觀境不以色湛寂回
真光成虧衆妄集嘉名表其常松聲起萬
籟朝陽曙扶桑

夜集西太一宮分韻得草字

晝寂白雲深聯鑣集瀛島南枝當戶生積
素流羽葆孤鐘息羣動獨鶴候清早石枰
松影侵持觴俗塵掃春風散琪樹頃刻光
灑灑玄談發嘉獎夙昔恣傾倒偶爾同心
期還山寄瑤草

史氏報春堂

白雲在屋角
凱風生樹端
下有慈竹叢
低昂候平安
盈盈玉雪母
光若赤瑛盤
朝奉鶴禁恩
暮承龜臺歡
教兒誦經史
清言消綺紈
築堂深且明
朱光映庭蘭
寸心諒匪石
寵辱非所干
世故疾危岌
奉盈身愈完
願言樹明德
朝夕應加餐

送于思容助教佐濟南廉司

黃鸝不可招
越雞迺司晨
圓冠壁水遊
玉雪映陽春
篝燈玩太古
垂簾避深塵
遙望淮南山下
有白頭親平生
汗簡意朝昏
具

芳辛念之不得見顧影非我身
檄書臺上來駕輿還海濱
晴風破遠浪慈烏飛且巡
雲帆蔽吳粟濟用懷經綸
為儒究理道六籍彌光新
空林閔幽蘭嚴霜養脩筠
明德在謹勗雍容奉昌辰

天師留公返真空
洞步虛詞十章
以導遊

巍巍道祖居層構
凌丹臺手持赤龍書
八景剛風開感彼下土人
積劫何崔嵬偃伏
永壽命夸誕魂益哀
愀然彌不寧招我雲

孫迴白鶴俯前導青童戒俱來

嵯峨金碧關神魚伏深淵呼吸空洞烝子

夜朝諸天頃刻風雨集咫尺星斗懸長嘯

千仞溪寥寥生紫煙飛符戒神魚歲久助

汝僊

玄圃饒竒觀陽葩霧霏霏玉壺湛清冰瑤

琴銷金徽混沌合空洞絕此見象機松風

代揮塵縹緲白縠衣興移暘烏逝節弭川

虹飛棊局儼未終白日何熹微蓬萊迺故

山為我一來歸真風詎永隔神光澹依依

崑崙鎮鰲極鬱儀交結璘故歲非我歲寧
復論秋春稽首三天師彌綸返真淳精思
彼嘉生雲施均萬民至感發自然不著亦
不嗔運世有通塞六龍無停輪洞章激微
吟長樂自在身蟬蛻迺清淨跡絕虛中塵
挹秀斟醴泉蘭穀鼎初調絳旂開景光下
招徹紫霄連蜷靜夷猶感彼父老邀司命
二十年守素澹不雕蜿蜒澍周原巖屨尸
江潮瓊章遏清詠丹輿導逍遙視之不得
見白雲在山椒

南嶽雲輪困英英生紫華靈旂澹無蹤來
集玉斧家玄螭有遺跡望斗紛騰擘鞭撻
隨三光服食制五霞上經永授之火鈴從
飛車

蘄巖陽平關古松化為人千歲永不飢食
之朝帝真中有一寸玉寒光敵金銀上結
三元炁下援七祖神舉世尊禮之靜念通
至仁

留城平蕪連雲深樹沆寥磅礴經濟心永
劫常不彫河車孕長命方瞳生本條瑩如

清容居士真卷四
十一
珊瑚枝粲若翡翠翹諸天咸唱恭贊我玉
晨朝人間倘再至玄化助神堯

仙巖鬱寥寥石倉貯餘糧云有狡獪子用
物能陸梁山花聳寶髻雲蘿曳青裳永念
斷真妄帝令深且長境化道炁增變滅始
真常叅差應虛牝羣峰屹相望月落杳然
去泉鳴玉琮琤

朱棗何纂纂碧桃何團團感賞千古心生
世常苦煎玄翁敞瓊館金母和紫鉛三咽
生羽翰空飛集諸天真炁常流灌眇眇復

綿綿桑田海波滿彈指三千年

大名劉節婦吟

孤鶴不累巢離鸞不飲溪溪明難為影巢
成誰與棲飄飄無根雲流麗如虹蜺下有
貞松臺白日晝且淒我思徹霄漢冥邈不
可梯青青東園柳子規當樹啼來者何用
歡去者日以迷擊石端出火擣辛能作壑
妾心倘未明請看井中泥

育王拱禪師示寂二紀嶼上人回

山中因寄塔主

石塔累荒土月落冰稜稜永懷跣趺叟松
 風吹不應山房舊淨供素壁一枝藤語寂
 絕禪觀機深超祖乘擊石迸新火諸天化
 為燈上有白玉峰丹梯杳難登黃流鉅野
 漲虎嘯懸厓崩斯道倘未泯微言足搜徵
 胡止水家三衢自言文定裔孫來
 京師三年念母以歸前述家學二
 篇以相勉復成一篇以遲其來
 武夷春秋功憤激渡江主寶書恣殺訛竹
 簡錯編組素王魯諸臣舊史足徵取是非

紀其真曲直繁可觀紛紛燕說徒誣鱗增
巧妬日月例愈深災異說彌盪或言九世
讎晚歲進吳楚羣公骨已朽聖筆孰與語
坐曹徒深文曲學日旁午苦心抱遺經願
言復師古

泰元積磅礴日月佐經緯煌煌往聖學鈞
考合表裏大道侔玄功不偏亦不破至靜
貫幽顯萬變集蜂蝟漢儒闡其端逐物失
聽視旁行分戶牖蔓說糅涇渭緬惟五峰
翁正色直如矢謝彼憧憧徒感物志愈肆

室虛生至和鼎渥實珍味歸求真吾師曷
哉蹈前軌

神京鬱嵯峨冠佩清且揚秘丘積縑帙瑣
窻爛琳琅有客願從遊永言觀國光或云
是鈞天九關嚴且防朝望羣馬入往來間
成行彩鳳鳴聲悲裂臆思絕吮知子親見
之素心益徊徨希名養簡默勿為衆所傷
還家拜慈母祝以永壽康春風戒重來歸
鴈同翱翔

贈餘姚岑易直登第歸里二首

束帶登玉署鵠袍立叅差筆海春波融沈
鬱流竒思俳諧詎素願阿世非吾師寥寡
天人際載牘陳雍熙媿青昧正說擬玄騁
荒辭劔鼎有至味酸鹹異其宜有客奉瑚
璉願言播聲詩初歌玄鶴舞載歌鳳來儀
東浙山水國冠帶連畦畛清門徭役空華
屋詩書泯晴江脩竹宅燈火敦孝謹下幃
論唐虞浮榮陋朝槿擔簦京國遊射策疾
飛隼精思坐待旦古巷絕遊軫蒼松蔭娑
娑丹芝凝蠢菌乘時足變化樹立在脩敏

善之僉事兄南歸述懷百韻

並轡承明廬荏苒十七禩陽林集總翠輿
室麗文綺寶函龍鳳章玉佩鸛鵠峙泰帝
興鴻文奎壁憲天紀梗楠購羣才弓帛徵
四起番番古遺直正色論道理深幾虎生
風神契魚在水三光密轆轤一札見萬里
雍容丹地近經緯審國是霜奩賚黃柑冰
盤錫朱李蒲萄與法酒承燕時漱齒俯陳
天人際齟舌衆披靡始言官高卑予奪慎
其軌終言瓊林資海寓極鞭箠儉情曲如

鈞讜論直如矢或以首鼠窺或以妖狐伺
奏終慶雲開再拜玉色喜天青回海鴈萬
柳色蕤蕤屬車度居庸整隊行過蟻老臣
汝居守清霜慎顛俟秋風龍虎臺帳殿紅
旖旎前驅列鵝鸛後御肅犀兕分行獻瓜
果傳醴復長跪念昔詞臣功咫尺寫天旨
大令追風雷小言媼蘭芷約制如竟寧渾
噩回正始告迂趣揚麻建社追賜璽摛文
具明訓援筆謝填委飛濤捲天吳歷塊超
駮駟伊嘏恩澤侯過手直三褫園丘導景

化秘祝陋五時漢皇禮鄒枚食粟倡優比
遺恨存至今文俳等方技緬思周廷彥勢
若鹿角倚懷忠牖納約凝命鼎出否追琢
羅寶尊刻鏤羞玉簋朽索馭匪輕深淵涉
無涖煌煌金匱書世守司馬氏春秋尊為
經不復繼魯史朝光鳩鵲明千花爛朱蘂
松風轉回廊蒼玉振徙倚龍荒啓神武九
域極芟薙羣公儼侍御挾矢佩象弭臨河
誓剖符披圖開賜履永言卑退全罔以強
力恃獻功上王所百一存寶度龜趺負穹

石浮語極褒侈墨兵勦衆妄筆獄破積毀
載筆非無能終歲不滿紙坐曹心靡寧愒
日頽有泚清談雜諧語陡覺兩曜駛自取
木鴈中俛首供諾唯交章日輪困涉署絕
戚否或云以彙升拾級上堂祀或云選清
望後至實竒士迎塵馬交趨候門足爭累
冥鴻天機深却立賦三已總角勇志道竒
服曳芳蒞澄觀竹素園讎勘徹昏晷儒宗
丈人行聞歎輒倒屣深湛皇王學揮手謝
青紫辭卑相如賦操擬靖節誅淒涼五公

齋澗忍羞筮仕孤音歎寡和激石轉商徵
浮雲蒼狗來黽勉渡江汜湯湯黃河道桑
棗日淪圯耕童戲殘鋏一一古戰壘霜叢
射新兔春蒲貫王鮪荒州靜無事拍手歌
于為枯灘鐵槎牙積溜玉迤邐太史非好
遊所歷廣聽視振衣入閭闔姻契論不鄙
相期在霄漢薄祿慎礪砥趨朝晚同班退
宿昏共止填膺雙髯張快意並手抵談經
陋莢茲證字窮亥豕斷絃搜麟膠滅跡問
獺髓愛兄靜以絜振鷺立水止霧深沐玄

豹日烟粲文雉鏞鍾倡鴻聲衆樂奏立伎
向來論交意瞑目謝諸子出處今不同評
議實相侶維吳稻蟹區民俗久瘡痍貧樞
蒲稗齊富廩立獄庠傾金恣聯絡所至各
關市令儀養叨憤軟語包詐詭郭解都中
夷景氏關內徒坐令襪襖徒終歲力耒耜
興文植清邵省罰厲廉耻重華政垂衣化
俾風俗美行行度東魯野水足荷芰微吟
數魚網薄睡倚烏几漁歌起微茫逸興舟
戒穢人言居移深嘉橘化成枳不見千金

泉一畝夷齊擬離羣增幽憂溽暑積恣滯
登坡帽低昂跋馬益遠企管鮑非利交金
石誓生死着鞭訝先之稅駕亦逝矣共享
黃髮年斯文永綏祉

題張中丞東亭圖

舊墅習真隱新亭幽且妍芳菲家林春引
眈增推遷令德資先猷嵯峨白雲阡總角
精典籍承顏綺襦鮮寒泉感逝波喬木矯
蒼煙欲論林間趣深掃區中緣招携舊鄰
保舉觴問華顛雞鳴柳陰直魚跳水紋圓

開田穀盈囷種果花滿川
荏苒白玉京念至心惘然
傳忠匪懷祿立身盡貞堅
披圖耿素志功成賦歸田

曲陽李孝子

寒雲生秀嶺朔風盪脩林
烏兔日以馳幽翳增嶽峯
朝看壑頭栢零露珠滢滢
有饌不能舉有酒不得斟
綵綵月下衣淅瀝壁
上琴登堂痛躑躅
審象陳輿廡重華古孝
帝五十猶素心坐令比屋
封表里存遺音立名在樹
德戚戚非所欽嗟哉曲陽
生束

書振華簪

送趙虛一道士降香南海諸名山

往從虞伯生
降香成都

振策峨眉巔身輕潛飛鳥懸厓飲崩流側
石穿暗篠高騫蕩心目每恨所歷少捧香
南溟使絕足騰驤裏龍淵明玕秀恍惚百
靈嗽乘飈訊八公挂席招五老巖光候陰
晴水氣變昏曉神君層巒倚商祭通杳眇
念昔結空寂厓广絕登眺希彼巢居子寢
作止林杪鍾鳴驛吏動危坐萬籟愀餘齡

水赴壑歷塊跡電掃韜精習澄觀俯矚八
絃小

屏山堂

賈星化飛魄脩織屹青冥何人媚幽獨喻
物傳真形想此宴坐時參前平且寧朝霞
紅冉冉暮雲白亭亭中立羞卷舒廓寥慎
儀刑君子法至靜處身視行庭古聖儼未
忘觴豆爰有銘茲峰合混沌胡然命為屏
天空月當戶陰風走山靈

題輞川捕魚圖

洛口疾如箭駢頭頰尾鱗散網巖隈泊千
漚水花勻輞川蓮社侶百味不入脣時危
涉飄蕩急管悲青春不如漁師樂風水候
昏昕連檣坐翁媪茗糜接婚姻永謝朝市
客炎涼生喜嗔

子昂墨竹

高風法清聖直筆師素王湛湛玄雲姿靈
籟生幽房解珮白玉京誓將泛滄浪所懷
歲寒友臨分贈琳琅

可竹軒

種竹水邊宅岸幘晞餘清湛湛玄霧姿匪
以介自名條達辭黑墳英光表朱明寂歷
巖下泉旋轉空中笙神交習真靜恬養忘
虧成南國倦溽暑鬱陶起深情展席卧其
下仰見踈星行始悟晉諸賢嗜此誠遺榮
我家十畝園新籜流珠纓邈然送歸棹矯
首蒼煙橫

子昂雙木竹石圖

朔雲盪空輪群芳益搖落老木競且嚴化
此雙鹿角粲彼江南枝歲晚彌卓犖或言

石五采服之混沌鑿威鳳招不來虛聲起
阿閣

以劉士先子墨贈薛玄卿

虛堂集萬竈高下旭流螢寒膏玉蟲綴幽
光耿晶熒巡行蟻旋磨龜手日不停範圍
金屑精膠轄桂杵靈劉氏祖子孫妙訣通
玄冥沈沈緝熙殿函封英露零龍戕掣鯨
海黯淡松花馨往事歸逝水殘壁傳千齡
雲館道氣寂守黑深儀刑散髮結瓊章研
摩固幽局持此以遠慰點翰補黃庭

飲酒雜詩十二首

春至舊疾作晝眠聽禽聲總角耽六籍萬
化何縱橫觀象太極初始悟無虧成環中
秘靈根群動一以貞吾欲乘彩鳳截篁以
為笙上窮崑崙渾下探渤澥清
夜黑雪初白高卧益自怡起看庭前柳冉
冉青春姿長松在西山鬚髮流銀澌豈不
念歲苦老壯當固持事至勿獨戚時來詎
人為得酒且深醉淵明果吾師
京師二十載酒中有深歡大雨即閉戶朔

風嘗解鞍客至輒笑之是豈宜居官振容
筮神著鴻飛漸于磐百歲苦世短萬鍾非
我干所以東方生吏隱神益完

陽鳥乘南雲飄飄振竒翮迫此梁稻謀居
移遂成客愧我食京塵誓墓志未獲雙峰
十丈松下有千載魄當年侍蓬瀛香芸森
寶冊高齋集遺編朱墨猶手澤戰兢愧匪
承永念在行役

少欲觀滄海下取珊瑚枝穹龜負玄文靈
鱗揚朱鬣盪舟不能往寶氣時紛披有客

方壺來授簡雲差差一以參太極九以師
庖犧振衣海神泣舉觴山鬼移

少觀五嶽形五性各有殊神州養深知百
靈受馳驅申申安樂翁定洛為中居契孫
乃九遷舜詎平陽都神京屹金臺五雲玉
芙蓉始知天經旋積氣為堪輿

家鄰天台山云有二子巖巍峩太古石纖
脩矗雲尖上棲西竺僧雪色垂鬚髯二子
與之遊作詩清且嚴乳花散窰甌瀑布飛
銀簾醉醒夢見之謂我何留淹

南簷孤生竹歲暮柯葉蒼豈不念道里因
之摧雪霜夷齊盧龍居胡為乃名揚入水
蛤有文踰淮枳彌芳受性諒匪移臨風酌
吾觴

弱冠不飲酒篝燈橫玉繩或云酒中趣湛
湛浮雲蒸棄書試其言杲若烏輪升天根
轉晴雷堅城為之崩妙言粲瓊屑逸興追
飛鷹醉鄉儻可居無功乃真朋

醉中發莊語爛如錦中花急急抱蘆鴈肅
肅投林鴉欲別意深省瞑目不復譁愧彼

獨醒人揣摩生咄嗟下馬暮入門雙目含
飛沙醉者忽復悟振衣正烏紗

江梅生空林歲晏美無度挈身踰朔易塊
獨此室處擅房望朝陽耿耿不得語雕籠
繁珎禽悵望秦鄉樹爰居東門止感饗非
素茹臨風嗅其英雅志懷故土

嗟峨白雲阡種松在山腰散之不盈掬離
離如麥苗迎陽漱靈津參差拂雲霄露重
碧天淨玄鶴時來巢俛仰二十年鬢齒日
以彫寄聲謝玄鶴相期躡岩堯

劉氏義門

芸閣寶書輯靖言繇外孫感彼南山豆淒
其北堂萱昂昂壽母懿槐柳植高門潛夫
豈無論莫述寒泉恩時康廣女史願以銀
管存

述郭楚望步月秋雨琴調二首

明月當清空流光滿西墀振衣獨徐行耿
耿長相隨我心如明月萬古無成虧偶逐
區中名遂為塵所欺抱影長夜吟別鶴同
離思行矣歸故山探玄結幽期幽期永勿

謾長嘯彈朱絲

歌枕絕幽夢卧聽秋雨鳴寒葉不自持
撼金石聲清商肅萬物此聲何不平寤歎
生遐心夙昔羞近名千金隴頭客荏苒朱
顏驚此夕秋思深斷續難為情載歌招隱
辭臨風寫餘清

送吳博文歸天台

中年困菽水絕足萬里道舊家天台山清
夢嘗草草秋雲起晴姿思逐冥鴻矯三年
鄞江上微祿紆素抱緬懷揚雄宅古徑雜

幽葆童年手種竹翠羽插雲表還家恍南
山訊俗憑舊老清名天所闕投冠詎終保
鳴鞭踐脩途置用實國寶英才剪春葩醇
語酌清醪解榻定有人行矣趨徵召青蘿
冑寒猿深啼怨清曉

送人之官遼東

昂昂秦湖槩直上遼海東層波起青兕出
日搖蒼龍中有仙人島卉服雙碧瞳手披
古墜簡返真極彌縫季世日以滴神功貫
鴻濛維聖居九夷駕言挹淳風衆情習近

慕飛塵哆青紅觀瀾悟玄化白雲澹無蹤
遠遊豈不樂感悵非終窮

得一齋

清齋不知歲尸坐觀芸芸神珠護靈淵歷
落光景分先時謹橐籥執機合緼緼淳音
出虛牝百靈懔無聞九闕肅夜令星斗森
玄雲永玩泰始體握之密成文緬言近年
士服食為竒勲寶氣倏消蕩累累竟丘墳
念此意愈冷幽居匪離羣

次韻蔣遠靜二首

清客居士集卷四
陽靈貫竒璞棄捐荆山傍悲哉三刑翁炎
空泣飛霜此寶不復試襲緹迺深藏百神
靜護之石老日月荒峩峩五彩雲散為白
虹光追琢在所用持以登明堂

猗桐生空林繁陰闕道傍永斲雲和器十
指凝冰霜玄鶴何方來鍛翮感摧藏合為
清商曲行雲渺荒荒素心諒平和鑒彼明
月光置彈集吾聽遺音在高堂

次韻鄭景尹二首

弱歲拾琪葉耿耿金石音遠為關河遊衆

嗜非所欽曳裾入承明寶策紛珉琳秉筆
直塗竄嗒然養書林維南有佳樹寸雲出
遥岑遲之不肯來辭以道里深跂予匪朝
夕盟言在茲今

層臺望秋林華樹在其顛上有青樛枝為
我玄鶴迺良時豈不感盤雲復迴旋瓊英
失零露百卉爭忿恚願言保遺直勿使衆
蔓纏一歌以慨慷再歌朱絲絃

再次韻

潛魚護嘉鱗雛鳳含溥音束髮勇聞道執

御羣公欽痛哭悼賈生敏給卑陳琳荏苒
歲月遷厠身羣玉林飛塵化玄髮所歷多
崟岑精衛有猛志不畏鉅海深遺聞理墜
簡脩名匪垂今

古有惜陰子觀日扶桑顛雞鳴起中夜紅
光朗流迤吾欲挽其馭與天同左旋志士
不並世寸心增結悄神澄水鏡淨世閱微
纏纏鄙語雜謬誤奉身直如絃

觀圖書次韻景尹

少遊竹素圃學道希心傳祖德允遐聞履

冰凜求全素衣入京洛飛塵浩難湔車書
煥皇度末技期雕鐫稽古在簡要敢侈三
萬言煌煌羣玉府遺跡森炳然滄波蓬壺
島古石仇池天方諸變毛穎寒暑隨推遷
感彼傳翫數寸心獨悲悄淒其衣冠聚拱
木思昔賢羸金白雲化青箱游蠹旋寥窅
鈞天夢髣像追四懸尤物詎足貴尚德庶
永迄愛君闕神珠出水復媚淵六籍儼遺
訓精思貴誠虔一撫玄鶴操以賡雲和絃

次韻廬山黃伯玉東漢名士十詠

食肝不知味詎為口腹人紛綸五經學講
道踰八珍古來植名士殺身以成仁念此
七箸微少忍非傷貧高誼動白日正色凌
三軍仲叔固義士井生乃天民

漢季日頽靡莽莽蕭艾叢孺子南州彥獨
立風雨中兩為故人吊斯道萬物宗湛兮
如止水脫焉如捕風儉德良辟難栖栖何
為容耕稼詠典籍食志非無功

叔度長閭巷奉高獨先知盛德眇莫名鬱
為時所師朗陵一邂逅此豈髮亂兒幽篁

抱靜節游龍隱深陂至今百世下清風散
肝脾仕止適天運不喜亦不違薄遊河南
道還家復牛衣

力田南山下久卑不學恭每於風雨時執
禮夷踞中甕墮迺失聲此意人所同厲行
名益彰無懷道之宗郭公果善相千載我
欲從

伯鸞事沉冥作勞賴仁妻身隱不願文更
治山中棲浩歌五噫詠麥秀何淒淒遐征
詎遊觀鳳鳥不復來羸博慕季子居夷法

宣尼幼無適俗韻與世非寡諧至今青青
冢猶有鳥銜泥

古有逸名士洗耳東海東韜精事肥遯浮
雲藐王公被髮或佯狂垢形滅其蹤季世
事標榜紛紛競罹凶所以康伯徒邈焉不
知終

幼安家北海流徙來東冥一帽常掛頭破
席屢見經六籍躬探微衆說紛聚螢老非
諸侯客肯至三公庭華生竟夭折管子終
康寧

龐公老江漢性本愛居山採藥山北涯歸
鷗送之還青林酒一卮白日茅三間時許
眼中士非鵠亦非鸞性不耐束帶矧肯貪
王官侶憐牀下子崎嶇卯金寒靜性閱變
化道充身愈安乘風學輕舉寒蘿杳誰攀
中郎天外鳳北海人中龍鳳以五采萎龍
以有悔終失身匪素志尚言乃真窮舉世
習玄默脂韋爭長雄之人佩瓊琚肆言刺
羣公落口掇真禍悲來事容容蘇公起深
悵蠻江盪舟中

清客居士集卷四
荀陳兩家子龍鼎合雞彝昔嘗窺其圖一
一無吝疵空巖古桂樹崔嵬匪今茲想當
下車時羣雛古威儀行酒拜滿戶入門揖
當碑惜哉或與羣巨構頽其基

我家司徒公清德炳漢朝盈盈丙丁綬燁
燁左右貂謂此非世美脫去孰敢招榮木
固同根其末千萬條勁節或峭正孤吟或
清寥世遠人事疏耳冷心志消瞻企法天
運盛衰感江潮束髮六籍功矢言期久要
詩來振遺響縹緲孤鳳簫前脩果未沫百

世詎云遙

觀真文忠公畫像

羣賢輔絕學嗟峨武彘峯熒熒方瞳光汲
汲汗簡中緬懷文明初蒼珮極匪躬執筆
侍玉署妙語工彌縫飛塵變蒼狗潛淵閱
游龍空餘經濟心勞徠飢飛鴻濁水投神
膠揚清迺竒功喬松不並世寒飈轉秋蓬
生世我已後正緒遺顓蒙惕然拜公像斯
道非終窮

曾大父樞密越公嘉定辛未與先生
同官奉常寶慶初同為侍從先生被

併識先公亦以論邊事去國獲拜遺像

王忠簡公嘉定入朝曾大父越公獲

生門人駁歷麾節先公則已捐館擢

向遊學藝女得拜端明公之次子今

尹道家世遺事纏纏不絕口今復見

其孫申伯于鄞喬木摧落楠深為此

懼瞻仰西山先生遺像因敘事契併

以自勵亦以勉夫申伯

陶道士心遠齋

少秉丘壑志養真事深寧清晨脫章甫習

道誦丹經熒煌金碧居明霞敞殊庭逸形

託榮觀漠然守心局矯首西南雲飛蓋垂

流鈴八表散清雨歸林何亭亭緬懷靖節

翁舉觴日沈冥之人靜且脩竒服養遐齡
長松舊云植秀色日以青素心靡違只矢
言寄山靈

寄題郭靖州絅齋

靈曜動橐籥萬物俱光晶湛然齋居子韜
精獨沈冥飛梭織翠霧層冰瑩踈星製為
蟬翼衣無華靜儀刑愔兮神君來不笑亦
不穎一以却氛垢一以永千齡我欲從之
遊車音振泠泠

清容居士集卷第四

(Faint, mostly illegible text in vertical columns, likely bleed-through from the reverse side of the page)

(Large red watermark characters: 蘭心園 書 館)

(Red watermark characters: Washburn Library)

清容居士集卷第五

古詩五言

為贛川連教授賦梅城

稜稜太古根
縈帶鐵不如
飛塵望其藩
却走奔無餘
中有冰玉人
指揮萬瓊琚
低昂受其職
補理成扶胥
天空斗搖寒
令嚴察孤虛
練袍立清夜
鮮明映犀渠
積雪誰為驕
慷慨紛糝糊
陰陽本一氣
開門使之俱
險絕貴有道
面壁非吾徒
司晨起視旦
蝶夢方蘧蘧



汴州次韻仲章

沙塵暗河津遊雲蕩無餘忽忽萬里念眇
眇孤鴻俱風水淹行頓異縣非故居雞鳴
逐前邁殘星澹遺珠空林野氣肅古樹慘
不舒飢禽何其悲驚飛挾鳴雛迺知俛啄
意愧我將焉如道遠怯驚隘終憶山中廬
誓言息機事解纓慎馳驅初夏鬱新潯永
日誰為娛因之寫初志臨風復躊躇

次韻呂學正古意二首

初筵秩嘉賓容氣清且明至饗不在酒尊

壘察東榮傷哉崇飲徒偏宕四坐驚中有
獨醒士覩然愧非輕持觴懼濡口孤吹幽
凰鳴永飢詎遺禮俎實期充庭
苦心嗜昌陽古澗香莫識之人遠持贈藉
以五色石密節懷黜章寒暑端莫易三咽
迴中腸起止良得力舉世希妍英椒蘭政
紛職慎勿強嗜之斟泉澡其德

次韻元復初春思三首

凍樹迴青陽羈禽競新哢喧喧人語浮稍
稍春事動澄心絕芳華小睡足幽夢夢覺

天宇新朝光集飛棟

遊塵逐平臯秀色翳榛莽油雲互東西鬱
抑不能兩昭蘇在玄功竟夕復延佇何當
扶其巔振翮窮委羽
遠客芳草思湛湛天外舟坐令親知踈低
徊此淹留古樹擢竒石清流匯芳洲素心
諒有在胡不為茲遊

雨後聞鶯

衆卉沐新雨幽光澹餘情岸幘碧窓冷卷
簾白雲生起坐調素絃促軫流鶯鳴侶言

田家苦招我田中行
昨宵隱其雷願言興
滿盈

送李德隆經歷其父居澧陽因乞
郡江陵以便省養

悠悠澧陽川飛鴻去無極
白雲眇何方抑鬱萬里色
念之不得從肉臂誰為翼
翩然領南郡解此終歲憶
楚宮昔壯麗冠珮列瑶席
瓊英輯佳思落筆洒金碧
淒其千載下正氣堅鐵石
想此問俗餘酌酒追寂歷
平生功名意甘旨惕朝夕
懷章遂其初居

夷亦云適藝蘭襲孤芳種橘企嘉植永言
區中塵過隙殊未息

節婦吟

為蒙氏作

幽蘭淨如洗
晻靄桑麻墟
天低泣清露
因依護紛敷
春風遠相負
迺在萬里餘
明月流素光
願鑒夫君裾
荷戈力行役
誓將保無渝
難以一日歡
永失千歲娛

蕩蕩明河側
雙星隨斗移
會合靡有覩
恍惚生怪竒
古意不復識
今情益多疑
契闊三十春
百年以為期
白首一邂逅
孤芳秉

華滋感此初意深臨風託長辭

次韻范德機海鵠篇

黃鵠海上來逍遙遊帝所寥寥九萬里五
采紛異覩朝霏西山霞暮結平地土喧啾
舞晴翠鵠首不復頰孤鳴者何禽振翮亦
遐舉愴兮邂逅之落月耿清侶芝糧產層
巔蘭珮在遠浦八表同其光欲言淚如雨
臨分致黃鵠出處各有許方壺渺麟洲輪
囷為君佇

送任懷可

點點水上鳶游游釜中魚鳶飛不得息魚
吻何時蘇興言夙行邁晴秋振脩途挈衣
海上州出日搖珊瑚采瓊以為糧拾羽以
為裾妙顏感芳蕤流光耀陽烏盛意勿復
沮清氛靜無餘維南有英雲矯首出門初
團團御飛蓋隨君為躊躇曷哉植明德含
章俟昭圖

同復初功遠飲仲章家觀芍藥分
韻得一字

深沈碧雲居錯落紫瓊室芳菲護餘春清

和表昭質高叢吐驊剛新茁角繭粟傾心
愛膏露正色浴初日含香紫宸朝奏舞彤
庭佾駢頭澹無妬背面意愈密杯翻王母
下斗碎壯士失霏霏玉生煙漾漾珠吐液
絕容第無雙薄醉飲真一嫣然屬幽賞為
爾寫清逸

洛詠五首示洛人張孟功任大正
晴雲起嵩嶽變化如游龍感彼金谷人聚
散同飛蓬縈紆古瀍澗百井爭汲春昔有
陳思王作賦雕層空相望不得語遺情寄

冥鴻金隄手所植荒淫竟無蹤

三川鼎沈淪洛水以土勝如何羣英聚千
載兵甲競僊人王子喬吹笙白雲頂下視
北邙塚今為狐兔穿斷碑化灰劫來者日
以盛箕山水泠泠側聽發深省

森森古名園玩芳納玄覽澹然觀物翁欣
至情不減看花烏帽落秀色起晴臉一一
卿相居舉觴雲氣湛尸坐寒暑遺妙言天
地範一去三百年寒松白雲黯
昔有好奇士絕頂觀海浪神泣肝膽翻興

逸天地放泥金與玉檢縱筆紀其妄茲山
久寂寞着屐事幽訪太少何岩堯兩曜隨
下上彩鸞凌風翔疑有帝子降
經郭闡微言理窟洞玄化汲汲嵩山叟反
復窮代謝白壁匪有瑕後賢極譏射麟經
書薨卒外臣不以假如何莽大夫簡牘得
矜詫往聖既莫從掩袂效喑啞

贈汪生

投簪事却掃衡門無雜賓衝檐鳥雀噪魁
梧見斯人遺我以明珠神光絢嶙峋風雅

清客居士集卷五
六
久不作雄辭逞斷斷愛君春雲姿回旋轉
空輪飛英不受采積潤凝青蘋老我意苦
短念此情彌親疇昔侍金鑿挽士志莫申
薦彌固百一視君鮮儔倫先聖六籍功願
言善彌綸辱贈莫能報清風響蒼筠

感興

明月不受采澄波偶成文壤壤玄黃中至
理孰與分南山有琪樹蒙彼山上雲層陰
闕朱光積潤養竒芬深林葆真素芳妍澹
無聞昨來京國遊緇塵日芸芸永念丘壑

趣攬衣意如焚

題王眉叟溪月圖

水清不受觸月高不受浴空景兩相忘松
風進虛谷之人閱真靜引手還在目服之
飛上天溪流淨如玉

書孝子卷

道旁拾枯松汲水作糜粥堂前九十母啜
粥端勝肉人言五鼎養形渥迺有辱擊鮮
豈無具彼網不敢觸乃翁三尺墳慈烏為
之築亭亭忘憂花甘露手可掬花開醉春

風百歲初轉轂之士歡有餘之人何不足
夜泊城北有懷孫秦二學士

英英二學士黼黻元祐初功名軋姦黨翰
墨尊寰區維昔淮南邦風流藹清都至今
舊文采老蚌遺神珠百年俎豆廢荒城屹
秋蕪黑首總論武舊老時言儒白雲去已
久來徃今何如蒼蒼灌木陰曾聞駐瓊裾
艱難視天運俛首猶唐虞稻米竭秋歛菱
芡餘歲儲白鷗眇天末蘆葦寒蕭疎懷賢
願有在佇立情躊躇

淮口阻雨二首

曉雨壓風力我帆同欸段怙怙蓬底眠晝
日慘易短獨行既無儔欲去不得返冥濛
水雲重寂歷榆柳斷淮流既東馳我行安
可緩縈迂沂三义始覺人語亂艱難意如
斯寒鴉佇江岸

小雨不作潮餘清在春樹冥鴻歸興深振
翼美無度淒涼舊如此荏苒已增嫵茫茫
昔荆榛桑柘青幾許淮水去不休歲閱今
與古風雲合浩蕩我輩勞步武人言上水

地沙流半焦土行役儻自然春雲起飛霰

詠史四首

青青虞美人欲舞不解前漫漫劉寄奴醫
國真茫然風迴下相里寒沙起蒼煙徘徊
古彭城亦復多流泉二者骨已朽胡為事
春妍人生要垂芳豈託小草傳丈夫與女
子籍籍同悲憐

寰宇設天險圖書已周知鴻溝定疆理屈
意陳卑辭永觀沛公豪豈無懷土思羣雄
亦鄉黨輕家迺相隨時來各忍性不復兒

女悲它年過沛宮
父老垂涕洟井邑
圖新豐雞犬猶前
時論功食湯沐故
里俱無遺成敗論
昔人興懷重嗟咨

留侯晚辟穀端有
避禍意遠招商山
翁不復為漢計平
生老鋒鏑帷幄乃
真智南宮論非諛
意冷終有忌雍容
視國本孱子匪神
器此坐端可惜欲
言且深慮代王豈
不佳語出禍立至
羽翼從汝成矰繳
幸我避百年願已
足投老空立異不
見吹簫民功成終
械繫

人言漢淮陰晚歲何卑隲英賢多混跡豈
復論恩讎泊舟楚山川緬懷意悠悠責人
斯無難此意猶前脩近世輕薄兒流落曾
相投飢來或乞食寒至將索裘一朝青雲
上泯默懷深羞高視絕舊好削跡同避仇
當年睚眦意談笑能相酬韓生固瑣瑣終
勝青雲流斯人我非慕微言做羣媮

次韻仲章初夏即事

吏隱習疏曠晨起遺世情積柳含綠潤幽
葵表朱明誰云地氣高炎暑從茲生新潦

變歎溥飛塵增墳盈養痾尋丈內跬步不
復行雲浮晚色盡平湖起秋聲炎涼在頃
刻變化何縱橫繕性合天和愧彼塵網嬰
有懷金石交飛蓋何由傾

城南亭

平生泉石意勝處時相關侶聞城南亭層
陰絕塵闌初夏結清讌尊竿連珮環涼襟
納虛白妙顏尊渥丹高歌互激越白日虛
且閑志適不願足後會期躋攀晴霞澹天
末迴首疑僊寰

讀范德機東坊藁

范子東坊居深巷蔽樛木架上一帙書墻
東數叢菊明月照西山清夜勤盥沐學為
孤鳳吟非絲亦非竹陰陽合萬籟逸響振
林谷水花不受唾天衣那有觸玉署青裳
枝三嗅羞獨宿滄洲有真趣從此謝榮辱

武當張道士京師禱雨迴山中

古有巖居子抱朴尸玄冥被髮空洞遊蒼
莽窮帝青手持九九文蜿蜒合揚靈維斗
司其紐習坎鞭流霆良疇已懷新燥露滋

明星滌滌原野燄迴風轉塵腥無譁夜下
令瞬息不得停茲人秘元化長跪耳默聆
崑崙挾潢漢紫霧噓青萍玄鶴滄以淒百
谷奔零零浮侈不足慕趣使歸巖扃天地
古橐籥鍊一清且庭詭幻歲已暮願言養
脩齡

觀梅分韻得影字

月窟迴初陽瑰室習真靜深居碧雲合澄
觀白日永南枝歷煙霧北雪辭嶠嶺蟠柯
翠交加踈萼玉秀整三襲雜纖繒一漱芙

清客居士集卷五
十一
蓉井浴鵠採其光寒蜂妬其影將養憂過
分泯默發深省天空流蟾墮露冷玄鶴警
歌罷誰與言觴至不復逞

送陳仲剛歸番禺

浩蕩南客心崢嶸西山雲憶昔登王畿縑
緗集同文執簡玉署側藻思抽竒芬明世
合儒彥詎有楚越分群姝嫉蛾眉念至肝
膽焚番江匯新田甘雨催初耘不念別者
苦孤翻誰為群重柳積翠霧酒盡不得醺
扁舟鼓新棹晴川淨芸芸

送薛玄卿歸吳予時有上京之行
飄飄江海遊渺渺關河役燕鴻有相避客
子無定跡南山火雲高北山雪新白想此
六月時相顧各動色堆傍青松樹上有雙
鵠翼愛君慎舟楫戒我專寢食擾擾行路
難風花亂如棘

有感

皎皎白面生長缺學短長箕坐激楚聲大
言響高堂有客將止之反脣臂欲攘客退
不敢言彼怒庸何傷盈盈百花露擬作終

清客居士集卷五
三
歲糧露晞百花隕掩袂翻徬徨

董道士雷泉齋

淵淵養空洞摩盪升天行翻車震崐崙旋
空紫金明下有五采雲散絲隕珠英以彼
一寸光八表須臾成逆順有正性變合無
流形火以明益枯水以堅始凝無為合冲
澹神化凌上清

三月十二日自

殿廬歸舍梨花

盛開薄暮與陳汝海花下小飲
兩人一百歲共飲三十杯雙花夾蒼檜天

桃倚晴臺白團燕山雪紅注天台醅振鷺
擬高下遊蜂謝徘徊昂首冠接羅捧心舞
穉總殘日疑餘霞迴風起輕雷不念影寂
癖但惜光皚皚珠衣點綴滅粟尺彌縫裁
團圓粧奩巧宛轉寒紋迴香深妬紫檀色
靚羞蒼苔幸茲艷陽盛不以塵土摧凡卉
工後先孤根靜栽培翫芳悟觀象擷英審
掄材較轆青紫場躡藉錦繡堆高羞折腰
柳逸亞橫枝梅慙懃識花意浩蕩為我開
殿廬龍光動瓊窓駒影催相迎復相恨欲

清客居士集卷五
去還相陪停雲儼若思
落月寒如灰
當歌
願秉燭渴吻驚耻壘

送祝丹陽使武當山

夙昔山水郡
浮身宅冰霜
迴首楚望深
乘車升武當
上有天一池
夾日紅熒煌
玄雲起丹甲
群螭恣騰驤
攀崖靈壽杖
坐石芙蓉牀
琳琅徹迴鸞
儼立承天香
麻衣採芝叟
百歲鬚眉蒼
授子以易知
永視元運長
摩挲古金人
鞚日月光中
臺古嶺萃天
風振層岡
揮手謝來者
下土何遑遑

贈陳文翁求篆扁

往聖扶天巧蟲魚構瑰竒辛勤汗簡功淪
落誰傳茲昂昂子陳子掇拾靡棄遺清齋
淨無塵素壁懸秦碑侶欲卧其下畫腹鬼
神悲氣酣落長牋屈曲生妍姿斷嶂立冰
箸迴波捲蓴絲百幻頃刻成長鋒勁如錐
解衣坐晴窓青眸光陸離客喧意自寂手
敏心相違遠憐李氏子自謂一代師蒼徨
大夫門筆冷情依依得非金注昏竟墮豪
俠欺我家竹石居甕牖迎春曦煩君作佳

扁朝夕舒頑疲夜月走魑魅晴雲鬱蛟螭
高張駭衆客傳觀恐群兒能事敢強迫妙
處通天機會須風日清醉墨傾淋漓

送李平叔之信陽

維昔文昌公幽蘭閔孤芳高秋振餘清百
卉爭歛藏颯爽眉髮古我冠坐鄞庠歌詩
闡溫柔宮商起虛堂絢爛五色雲縹緲鳴
鸞凰至今老諸生猶能記鏗鏘乘風侍金
華蹇諤懷剛腸諫疏納帝榻百壬歛妖芒
年運既莫從精爽回雲鄉空餘子雲宅澗

水猶湯湯永思古遺直江湖眇相望
謁來芙蓉峰喬木鬱以蒼嶷然孫枝秀
妙譽參珪璋投牒山水州清溪赴輕艫
群公列贈語握手揮離觴我生識面晚
懷賢意何長慨茲衣冠胄蒹葭隕飛霜
交衢泣零落寸心實徬徨斯文儻未墜
龍虎回天章願言紹正學青雲縱翱翔

贈徐中丞二首

南海有玄鶴孤唳雲稜層天池不肯下
厭此魚鼈腥露冷懷長飢慘澹舒寒翎
空巖

藏喬松鬱鬱太古青喬松意何悄陰籟驅
群靈下有散髮翁默誦離騷經妙顏粲瓊
芝孰視眸晶瑩鏗然拔長劍神光發新硯
倏忽去已遠玄鶴空晚晚為言來何遲迴
風起前巘

鳧氏哀吉金紅鑪範黃鍾鍾成飾雕簏岌
業蟠虬龍大鳴淳以希小鳴和且冲高懸
饗群帝祥雲布青紅群帝難強留一去三
千秋張筵設尊斝庸錫南諸侯一擊黃鵠
來再擊飛雲收徬徨不敢聽亟以還中州

師曠世本有左高悵誰謀終然侍帝所天
地歌同流

拙訥齋

樗櫟老薪楨鴈以不鳴烹受形既非材卒
莫全其生在昔有至人觀化通百靈至言
貫圖象妙思窺璣衡乃為萬物宗熙熙遂
生成鬣彼青牛君深根護靈扃永哂鄉原
子木偶欺聾盲設喻深止之跬步增慎兢
世路日榛棘韜精事沈冥滄江渺何許願
言濯吾纓

送鄴陽劉縣令之官宣寧二首

鬼鬼馬邑州火山蒸鬱陶霜勁角弓直草
淨蒼鷹條平沙細成塵迴風湧銀濤想彼
強盛時馳突聲噉嘈烽煙徹雲表低昂望
前旄樓煩古咤襟燕秦據其尻八月秋氣
肅千家釀蒲萄

帝京布文教列邑施官曹井屋魚鱗齊禾
黍黃雲高幡然土俗變怙首羞雄豪出宰
試敏手良庖靡更刀善政舊謀傳據案除
民饗村村煙火通長塗罷建橐雞鳴流水

遠鴈過平陂，翔餘情樂觴。詠臨風，謝喧囂。
題文與可風雨墨竹

妙筆抉天巧，黑雲參差高。偃疑受雨深，俊
欲凌風翔。颯爽隨卷舒，清涼散塵囂。湛湛
不受暑，靈籟虛窻號。緬懷文湖州，玉雪人
中豪。想此旁礴時，葆光解天弢。老僧道機
熟，形影隨目逸。持以深贈之，生意窮秋毫。
高齋夜氣寂，定回起層濤。

答李生裕

尚書大同公曾孫

英英金華伯，皓首人中龍。橫經古鄆水，歌

詩傲群蒙

舊為鄉里教授歌
風雅以訓諸生

正色侍邇英

微言動宸聰一疏不合意孤身轉秋鴻俯

仰乾坤旋舊聞眇遺蹤坐令詩書宅寒雲

翳孤桐維曾秉文度月印五采虹知我夙

昔侶贈言啓春容清朝集文儒直筆書清

忠作史聖有訓狐裘覲蒙茸挽士貴無方

正色誰為宗虛舟萬斛積遇順凌剛風明

時詎淹留勗德會有逢

題巨然楓林雅集圖

楓林集虛秋灝氣轉寥廓坡危草纖纖水

露石鑿鑿四子何方來黃塵滿芒屨據流
濯其清班荆坐盤礴山童注新泉支鼎拾
薪籜方囊濟勝具一一隨取索想彼談笑
時天袪脫塵縛上追巢許高下陋山王薄
淒涼金谷宴腥羶甕雞樂又疑東山遊粉
鈿汗花萼老僧習止觀雅趣隨筆落振衣
從之遊素壁儼酬酢

避塵軒

飄風捲飛蓬咫尺隔煙霧馳車與急騎
憧憧走當路各云有所之瞬息不得語
山陽

清容居士集卷五
六
荷篠翁守舍視日暮酌彼澗下泉膏沐美
無度寒光映玉頰浩論巖中趣永謝征塗
人看雲養真素

次韻伯生榆林中秋

榆林月中來今月向此出天低鳥翼滅野
淨田事畢驛馬西北鳴候吏語喧唧我行
起視夜烟若積雪白昂頭望玄宮耿耿駐
營室坐令八方澄不使萬景沒徘徊清影
孤躑躅悵後發

送鄭景尹還里

蟬冕生詩書世胄迺鄙夷沈沈喬木宅風
煙暗茅茨此理固莫詰或言有盛衰堂堂
魏王勲談笑帝者師風雲締嘉會青史傳
忠規諸孫靜且秀振鷺遊天池鄉社三十
年永謝紉綺姿興至來上國窺探抉幽竒
聞聞與見見柳下揚鞭舜前聖六籍功尊
聞審群疑江源發甕口濫觴渺無涯願持
一寸膠黃流化晴漪天風捲秋濤舟楫慎
所持時至諒有得衡門詎棲遲

李野齋別墅圖

別墅依平陂，翳翳桑麻陰。田翁理農具，晴
雲起遙岑。于時春事初，佳樹響鳴禽。先生
朝出遊，呼童佩瑤琴。仲也行比肩，叔也聲
相尋。興至或坐石，臨流散虛襟。有客携酒
壺，勸我手自斟。共言義皇時，古風藹淳深。
巍巍居仁里，盛德世所欽。三鳳在高岡，參
飛起清音。恂恂化卑讓，歲往猶傳今。披圖
儼見之，慰我夙昔心。

子昂人馬圖

飄騰天山霧，盪摩玉京雲。耿耿萬里姿，矯

首空其群迺翁愛神俊泄筆五采分翁歸
侍帝所乘化觀芸芸彼亦與之俱追風超

九垓

時松

雪翁已

年

題墨蘭圖

秉芳空林中介石交不黷飛英散玄佩受
露以膏沐群妖春炫晝墨守益慎獨豈不
念歲晏自獻傷我足矯矯金石交挽之不
盈掬疏清湛虛心振直耿絜腹昊天有正
令俛仰萬物肅臨風獨躑躅白駒儼空谷
次韻瑾子過梁山樂三十韻

大野豬東原狂瀾陋左里交流千尋峰會
合百谷水量深恣色藏神靜莫比擬碧瀾
渺無津綠樹失其埃揚帆鳥東西擊楫鷗
沒起長橋篙師歌短渡販客止天平雲覆
幕灣迴路成砥鷹坊嚴聚屯漁舍暎渚汜
柳絲翠如織苻帶組交疑出日浮鉦金明
霞紆綬紫一歎澆腸迴三頽慰顙泚高梳
列魚貫遠吹生鳳翥前奔何無休後進復
不已遶如林烏旋疾若坂馬駛飄飄愧陳
人歷歷見遺趾流移散空洲崛強尋故壘

波清鳧聚陣日落魚會市土屋危可緣草
广突如峙蓮根漲新圩蒲芽護荒坻水花
碧團團雲葉白迤迤瀆脩出飛泉闐闐搜
故址緬思重華帝允屬夏后氏彝倫著箕
疇偉功傳遷史目力渺無窮行跡端可紀
前村將柔桑沃壤接良耜餘芳錦堆爛宿
麥翠圍侈迺知東魯儒終作中朝士養源
匪滉瀆包荒納遐邇驅馳屢經過感歎復
慰喜南還幸遂願永雪洗耳耻

憶昔三首

憶昔白雲阡有松如車輪初日炫五采湛
湛珠露勻是時十四五恍不知其因有客
笑指之慈蔭在汝身猛志親六籍百川渺
無津懷刺慎所從一一先朝臣文昌古遺
直談經鬱紛綸授以漆簡書經緯通天人
碧波掣鯨魚瑞錦翻麒麟昌歎世所鄙食
之迺竒珎廁身金鑿中黽俛二十春懼貽
先師羞執筆常逡巡即今已六十誓墓廬
松筠厚德靡有報淚與寒泉淪
外家甘盤宅門閤誠煒煌高懸金碧榜中

有衮繡堂珠璣左右侍絲竹儼成行幼不
識慈顏到彼心徬徨每歲兩過之嚴訓具
有方膏梁病居養久爾生惰荒七歲誦詩
書十齡學詞章駸尋志學歲折節師老蒼
紀事法班馬真心契義黃謬與時彥交寶
書閱琳琅今茲乞南歸往事增慨慷興懷
陶與蘇秉筆追耿光凱風有遺思願言繼
餘芳

寥寥帝王州我翁佐其治有亭名朝陽青
溪清且駛旁有籌邊閣群公集裾翠翹翹

萬芰荷雨過爭旖旎飛觴羽書來翁霍江
上燧我冠極遊談戎弁生縱恣予時侍其
旁側耳聽論議翁言不見取投劾乃謝事
坐令百萬家解甲豎降幟徘徊夕陽亭晉
宋政相侶

重巖圖為劉明叟迺翁作

夙昔慕清隱振衣躡層巒飛鳥出天末白
雲生樹端稍覺所歷險撫松獨盤桓緬彼
巖中人塵世靡有干飢食千歲芝朱顏烟
團團一日不見之披圖儼清歡崩崖骨枯

藤迴流起危湍微茫暝色共凌亂生綃寒
心期果冥會願言力加餐

王叔載以江梅有佳實託根桃李
場為韻見貽因次其韻

百川既東流震澤成三江學海詎有窮沂
源探敦龐緬彼學古人善問如鐘撞簞瓢
豈在樂樞衣願為邦

六籍會有厄禍繇漢晉開支離起田孟誣
偽興姚梅綿葛匪正禮區區存曲臺吟詠
既莫分褒貶以為才

峨峨神京秀轍跡貫九有奉璋弁如雲執
轡沃在手欲窮義黃心編簡滅科斗研摩
詎無念急景謝衰朽

風雨乖素期山雞鳴喈喈豈不念夙昔愛
此日夕佳平明視青天義輪御中街榮悴
會有時願言壯其懷

高門深寧翁晚歲悲絕筆愛彼樸樾才化
為梗楠質春花五采妍秋至詎俱實遺文
粹東楹賤子願叙述

昔聞中書垣上有紫薇閣微言續九共妙

義追八索嶽峯大厦傾作記金鑿託深悲
在廣招寥窳鈞天樂

少小不自持曲學尊蕪繁舉觴一酌之為
言護深根先天有至理能使月窟溫談笑
襲師訓詎知雪齊門

斥鷃不能飛欲作搶榆高何如阿閣鳳守
真始風翔志士惜短日碩人養屯膏蕭脂
始薦鬯食黍迺雪旻

昔年委閭巷初不願祿仕紬書探異同擬
作前國史念至事益非委命以脩己勿為

衆所譏不如道旁李

君才如江梅不入桃李場
徬徨念先猷貫鵠始挽疆
後生捕形影爭言早升堂
唯餘白髮士耿耿無它腸

董生噩上人以叔載韻見貽再次

韻

關河一轍跡耿耿明天江
五方各異俗中州誠駿尾
吾欲上帝閻帝閻不敢撞
終然返初服養佚歸海邦

遠宦三十年石田今始開
觀象慕易京登

遠宦三十年石田今始開
真想仙梅夙昔希
匠石歲晚成輿臺
志念詎不深
樸樛慙非才

弱冠慕靜居
掩息空萬有
老禪深愛之
微笑示以手
忍欲如忍事
吸醯過三斗
終然寒松勁
不作朝菌朽

鞞帽成戚施
逆耳風其嗒
昂然望南山
愛彼日夕佳
朝來何所見
萬馬盈天街
所以巢居子
終然養澄懷

辛勤下帷生
涌思不停筆
範鑪鎔吉金
變化銷其質
湛深陋雕蟲
多聞覈萍實
袖手

清容居士集卷五
三
母自藏盛世富紀述

噩師禪林秀宛在諸天閣當其調護時危
石繫朽索作賦極剪裁衆物各有託氤氲
荆山玉洋洋咸池樂

玄圃有琪樹不使枝葉繁譬彼績學人芟
蕪養天根歲暮霜雪至銅柯生晏溫一為
梁棟才落落懸金門

吾師深寧翁屹屹秦華高佳弄時一遊不
使凡羽翔方壺貯神藥變為五色膏服之
生羽翰陋彼東方椹

稟性非好遊亦不願祿仕感彼獲麟翁歷
聘刪魯史正緒願有傳固陋敢私己年衰
絕聞見謝彼井上李

少壯勿自摧振容上詞場鷄膏淬寒鋒談
笑摩堅彊藉以雜織羅貯以白玉堂辱贈
莫知報因之結中腸

芳思亭

大父尚書公治圃南郊有堂亭凡十五
方池脩廊屈折便宜雨甚亦無礙遊事
逮今荒廢踰四十年故基陳跡不復可

考近築一亭雜植花木廣不踰畝髣其
萬一名之曰芳思玩其英華將以紬繹
志興翰墨有紹是則先公之志作詩
示瓘瑾併求親友同賦

侃侃尚書公投綏理泉石五堂適寒暑
十亭送昕夕瓊英玄圃秀美蔭嘉樹碧脩
廊不受雨來往隨履舄紅雲漲方塘丹霞
耀翠席嘉魚黃金掌幣見眇莫測辛勤三
十年深逝晦朝蹟遺訓示子孫樹藝比其
德浮雲變須臾百幻倏消蝕空餘鄭公莊

耕稼給衣食，緬彼行樂時。衆植各有職，以
茲一畝園。髣像見疇昔，幽葩與群卉。生意
日不息，朝陽漱靈根。三咽妙絢繹，曠懷事
幽賞。誓矣躬六籍。

次韻袁季厚惠苦筍楊梅二首

食苦不願餘，甘回迺稱美。空巖養滋味，老
叟清晨起。斲之玉箸圓，拾以付稚子。駢頭
萃豪門，咀吞訝金矢。維時朱明中，盛德協
清徵。翛然在陰翳，儼與松柏峙。玉液生華
池，可廢杜康祀。含章守元吉，黃中本通理。

清容居士集卷五
三
繫腹表正性要以除穢滓初如橄欖食不
作即且棄世方尚腥羶易牙正專味愧我
清齋客足音楚然侶

空巖迸瓊珠蕭蕭白雲中恍疑群仙立欲
脫煙霧叢招提者誰主日出撞金鐘笙簧
激清濁旌蓋搖青紅遂令彼林谷徵索恨
靡窮侍臣久歸田不數蔗椀功頃筐遠相
致齒頰生冰風昂昂長松蓋下有萬馬容
同源匪異本斯文永為宗

清容居士集卷第五

清容居士集卷第六

古詩七言

題高彥敬桑落洲望廬山圖

為秋泉作

長江亭亭桑落洲一塔獨傲蘋花秋邊聲
已逐鞀鼓盡水氣欲挾漁榔浮謫仙騎鯨
五柳老真景變滅隨沙鷗空餘秦箏與羌
管斷續不洗琵琶愁玉堂小窓解蒼佩宴
坐得意毫端收空青點雲碧痕濕方諸取
月寒光流匡廬老人在何許侶覺領首相
遲留佳峯稜稜鐵鈎鎖寸樹點點銅浮漚

要知翰墨灑清氣俗子政爾勞雕鏤秋泉
山人息機事青眼不與王公酬高張素壁
凜太古擬跨獨鶴還磯頭人坐江湖在適
意底用絕俗埋林丘披圖覽古重嘆息天
際杳靄疑歸舟

秋泉德生仲章梅叔章周儀之皆

次余韻題廬山圖再次韻以謝

海郡列戍連沙洲榆柳插戟搖清秋擬從
京國洗氛瘴黃塵復作煙花浮西山紫翠
不可望但訝積雪如明鷗愛君寒齋之畫

幅瀟灑不寫人間愁
骨中丘壑我豈少
奈此磊嵬難為收
宣城詩法挺二妙
炯若玉瓚盛黃流
永興天機愛神俊
碧眼一顧群無留
千年周子古風月
袞袞亦散空中漚
乾坤無言混沌鑿
頗恠我輩勞鐫搜
沈冥天台老僊伯
清坐自與廬山酬
天青無人月色古
縹緲五老疑駢頭
功名營身旋蟻磨
芻豢得意崇糟丘
何當相從老其下
釀酒一醉黃金舟

張彥清以復古硯贈友人目賦長

句

高皇南遊倦鋒鏑宴坐清都賓出日骨中
筆陣掃玄雲時與端溪評甲乙平生紫玉
無纖塵小窓寄傲茶甌春馬肝生寒出古
色鵝眼獻秀憎妖顰烏號已去寧復得蘭
紙昭陵空悵憶猶餘舊賜落人間漆字糝
糊記朱色集賢學士曾次高愛此靜閱濡
霜毫迺知貪夫罪懷璧底用長物為神勞
清齋持盃好顏色楚人之弓楚人得平生
弟兄今始知一笑相看竟何惜蕭齋老人

筆如錐松花蕩漾搖輕漪江南採菱曲已
遠願寫紫府虛皇詞

金華曹道士白雲樓

蘇仙念母母苦飢化作白鶴時來飛我聞
紫虛亦官府朝夕往返勞天機何如金華
有真隱築室空翠搖煙霏松花麩蜜五鼎
養丹砂汲井千年肥我生不識萱草歡孤
身永日懷春暉白雲在天詎可望遲子歲
晏山中歸

賦廣帥平寇還

清客居士集卷六
三
蒼梧之山利如戟五溪南行水如墨文身
鏤面號為人盛口磨牙時剽賊將軍手提
丈二笏匹馬直入深林居摩挲銅柱寫殊
績南人自此長為奴檳榔快嚼端禦瘴蕙
茲不將真避謗繡袍初賜簇金鷗聚米為
圖指豪壯萬里功名非偶然輕身許國誰
為憐莫嫌儒冠守青簡能淬筆鋒書定遠

謝王參議送練春紅二枝

玉堂老仙玩幽獨閉戶無人侶初溲倚闌
岸幘領孤芳款款輕紅冠羣綠化工有意

卑凡卉積李崇桃空眩目爭先鬪巧等堪
憐已向東風盡驅逐此花清妍淨如洗妝
拾餘春傲榮辱何郎湯餅徒試粧太真溫
泉空賜浴天然生色鑄真態亭午低頭睡
初足誰言花后窠竒絕我恠酪奴能汗觸
嫣然一笑奉清懽莫把金樽歌別鵲并刀
妙剪駢頭來珠露淋漓袖新感侶嫌凡子
多京塵却恨高人付流俗微風澹蕩新雨
生強拭愁容吐殘馥擬將色筆寫清意綺
語非工那忍瀆徘徊中庭月過半翠袖娟

娟泣寒玉

題董簡卿瀟湘圖

瀟湘之水太古色
煙樹空濛成寸碧
奔騰日月轉銀丸
噴薄峰巒凝鐵石
楚棹相將客獨聞
楚歌歎乃人誰識
望盡蒼梧不見雲
千古靈均空悵憶

絡馬圖

秋原首藉肥雲屯
帖帖此馬和且馴
屬車效駕豈在力
愧汗絕足追奔塵
良哀不生造父往
公子毫端意悽愴
虞淵逐日終飲

河出門加鞭奈爾何

康樂園

長安韓德卿夜夢至一宮室扁曰康樂園因名其堂以

奉其母

至人無夢夢乃真
瞪目一視空中塵
悲懽蟻旋水東注
遺珠罔象迷其津
持蠶噉曰逞談詭
取禾坐極夸榮貴
不如長安韓生道上
眠念母還家枕中
記紫霞之宮那俗
書煙霏霧結開雲
圖虛靈變化在頃
刻齧指疾應維心
符城上烏啼畢
迺尾倚門獨占
乾鵲喜萬里
辭親真可憐
書來端有平

安字

贈杜秀才歸省荆南

臨江種橘橘易朽滿籬積金金作奴何如
遣兒束書帙婀娜初服游鴻都從師之樂
端解語暫作庭前綵衣舞會待明年春水
生雙槳如龍上天去

贈拙訥子

萬言不啻一杯水刻楮徒費三年功何如
宴坐寂真靜木末時數南飛鴻長安之衢
塵囂囂願言飲垢如飲蜜鸚鵡作賦真有

才至今江浪猶銜哀

寄南劍李士弘使君

水雲離離千疊峰海日如鏡行天紅使君
新沐坐清樾筆底丘壑生陰風玉蘭之花
不受觸日給飛泉三百斛高春打衙人不
來鶴立蒼苔動新綠

送任道士歸武夷

武夷之峰高極是浴日離海朝為賓石床
芙蓉迸膏露乳竇醞淥凝長春陰崖恠壁
鳥跡絕葛藟當戶苔鱗鱗神君枯魚古籛

豆曾孫毛竹今霜筠千年金骨幻九目玉
匣九鑠光如新想當精思握宇宙魄質已
化能成身我聞帝居亦官府風馬決漭空
中輪愛君釣鼈避東海笑踏北雪鬚眉銀
寡寥空山太古水清夢入髓時相親誰言
五色亂吾目得意忘象那非真歸來玄鶴
忽不見勸汝速浣征衣塵

送郭天錫還京口

朔風吹塵著馳裘
款款凝絮玄霜浮城南
泥深擁車轍矮屋
夜卧鄉心稠暮春
雪消

花始放積柳婀娜沙中洲布帆在手不易
舉目數過翼隨雲流人言檐簷古奇遇
邂逅一見能封侯紛紛寸舌有榮辱智士
縮吻成身謀愛君亭亭日中鵠玉色已變
扶桑游紫芝為糧露為醕北適瀚海觀羣
漚素書滿囊不干世磊落肝膽看吳鉤新
編剪雲彩鸞舞妙筆入木寒藤抽氣酣登
臺望陳迹忼慨直欲微言酬舊家鐵甕古
城下春浪汹涌今悠悠但當清談且飲酒
往事寂歷遺磯頭黃鸝空桑子規怨橡實
已

清客居士集卷六
十一
盡榆根留長河滔天怒蛟走底用華表歸
來愁江湖清歡眇去袂風雨疾意催行舟
人生會合定有樂念此別意空綢繆

燕吳閑閑冰雪相看

豪門炙熱熱如暑下馬還家汗流雨徒將
嘖笑作清涼萬事回頭總塵土那知道人
玩丘壑一榻高寒閑栩栩碧雲散作明窓
塵妙墨還為小山霧平生冷語出曾臆頗
恠梅花猶媚嫵崢嶸歲晏凜今夕商榷斯
文共樽俎要知冰雪本奇絕正色森寒傳

太古我聞崑崙有至理陰火玉泉誰解煮
會須鐵石起風雷手扶玄關破凝沍人間
寒暑潮去來物外陰陽月吞吐閉門客散
真兩忘竹影離離滿前戶

灑陽張節婦瓶中杏枝著花因賦
陶人妙合陰陽機凍壺頃刻回芳菲盈盈
綠房綴冰蘂玉蝶婀娜穿帷飛佳人蓬鬢
不下堂手綉孤鳳橫匡床寶刀剪繒試春
色翠袖慄澹顏無光烏頭可白珠九曲造
物深知憐不足故應試此一枝春點綴扶

疎驚衆目君不聞天上瓢鬚龍平陸成波
濤又不聞壁間壺兩曜瞬息如跳珠齊諧
茫昧不可詰烟目看朱動成碧張氏之壺
如截肪真火煉質千年剛枯根借潤表貞
志慎勿語恠歸荒唐

仲章與余連舟而行仲章指畫皆
不在人後夜泊甲馬營余舟適先
至仲章有詩曰以奉戲

我船如縮鬣瘦僕凌兢空挽曳掩篷熟睡
初不知晚向沙頭踏新月君船如生駒追

風破浪爭驪呼青春擢郎紅蔽膝搖唇感
口歌吳歛昨宵甲馬營前宿大侶天公憐
不足回帆望君君不鷹出沒高梳轉河曲
人生作計那可既誰能盡已不盡智積薪
居上東方愁相位還須跛男子憶昨都門
經歲除風吹乾雪塵模糊閉門擁被謝不
出時人背笑何其踈只今船行一千里萬
事乘除總如此愛君玉雪雲中英我歌作
勞君且聽

蒲城孫世英編脩父年九十四號

嘉遯翁院長而次各賦詩

蒲城之下嘉遯翁銀髮髡耳雙碧瞳少年
流離老康樂布領踏醉歌春風春風畏人
屢歸去阿翁扶春春始住穿花入市爭捧
盃採藥還家共携路諸孫青襦誦魯論寒
燈夜授鄰壁聞泥深翻疑犢車險雪釋自
訝駝裘温憶昔種松如指長俯仰鐵榦參
雲蒼桑田變滅理固有底用化鶴來還鄉
只今翁年九十四萬事如雲日嬉戲回首
塵中輕薄兒奔走流年竟何事

嶽麓圖

積石落落雲中駮冠以蒼松藉瑤草天柱
脩纖立晴昊絳霄雲璈誰擊考揚許之君
顏色好冰綃為裳車羽葆永懸垢濁增扎
天湘波層瀾勢灑漾跳珠浮玉簸洲島一
洗氛瘴蘇衆槁爰築廡麻俾終老出門倚
天心悼恍玄穎浮花落縑縞無跡空飛詫
神媪肘後藏之五色縹念君別去塵浩浩
歸來歸來守其寶

送何太虛歸山中

沈客居士集卷二 十一
飄飄兩屐山中雲青眼不受京塵昏意行
扁舟本愛雪獨去五柳猶當門人言江湖
在遲暮立談雙壁非謬誤相逢挽君君不
迴落日蒼茫蹇驢去

同子唯賦水車

挈瓶之智誠有餘抱甕之勞亦良苦何人
嘗巧挾天機河伯逡巡魚鼈舞昂昂長身
卧塍岸捲地翻濤敵驕暑誰云龍骨化梅
梁未信魚身作橋柱縈紆香輪過流水突
兀雲梯卷清雨橫陳歌板促紛紛倒流谷

簾聲齟齬東家饑婦顏色惡步步生蓮空
媚嫵陽烏流爍汗成漿平陸湏臾涌銀乳
推移燥濕意本同竊奪陰陽天所怒人言
無踵能自至跬步周旋路脩阻不辭滿眼
看黃雲歲晚論功付梁杞君不見田舍翁
年年苦辛與我同天寒破褐厭糠覈仰視
屋壁知誰窮

次韻夏明道紅梅

江南徐生圖沒骨筆底妖妍等塵物此花
絕俗避春風東望扶桑入瑰室閨風羣仙

笑清寂故遣瓊英侍巾拂龍肝麟脯厭腥
臊以斗為盃飲真一嫣然乘醉下塵寰欲
向晴空舞紅雪崇桃積李行飛翻固此貞
容莫旌別效顰不語空捧心美好何由在
粧抹懸知正色衆所忌況此纖穠逐時節
憶昨歲暮天號寒炯炯霓裳傲冰月誰言
凍吻不敢吐妙思端須續神筆飢腸雷吼
空九迴勁氣雲摩難百折人間好語詎有
盡三嗅清香應倒絕

雪汚齋

邢醫取靈樞雪者
汗之語為號

有客飲垢如飲墨三尺之泥及馬腹平明
對鏡鮮衣裳意氣摩雲飛食肉清虛不來
空慨慷願君勿走治其狂明窓翫塵在吾
鼎淨洗紛紛冰炭腸

次韻閑閑甲子雪

絳霄僊人雲作席宴坐玄關已知白萬妃
婀娜布青陽淨掃嚴凝驅伍陌飛雲散作
平地舞剪綵寧為舊時色西峰秀筆眇何
許侶換當年銅綠格洛陽之人凍吻縮詩
句那能隨燭刺大鈞有意迴昭蘇至寶無

華匪脂澤乾坤偉觀雙眼明高卧元龍須
百尺

贈錢唐吳月湖

棄右班
學黃冠

君不見後湖僊一官掉首餐神丹月明江
上杳然去唯見玉珮雲珊珊又不見姚將
軍夜騎黑驪趨劔門飢來青城采芝食童
顏逸足追奔雲人生富貴那可必偷竊陰
陽亦竒崛陰符自與素書通赤松來歸乃
真逸西湖明月不可釣呼吸湖光月隨照
要知心與月同明暫假孤光敵清皎憶昔

黃霧衝八蠻，髀肉消盡口。吻乾萬里生，還
真幸尔十年老。去猶淒然，即今落魄隨塵
緣。丹霞玉樹壺中天，何年輕舉化飛鶴。歸
視城郭同蒼煙。

送趙君佐茶使

淮南食茗如食粥，清曉烹煙出茅屋。生來
不識太官羊，翁媪相看夸不足。連綱貢餘
知幾春，排檣接纜來儀真。莫言此物常苦
飢，船中估客肉常肥。

黃臨汝以長句索筆次韻

寸錐飲墨工傳書千載妙蹟遺官奴寶跗
綠沉不易致葫蘆荆管那能無古來志士
心獨苦採荻夜畫灰成圖書窓歲月要有
限作計何必輸人鬚中山卯君被羈束論
功且復歸韓盧柳家鈎鎖本新樣內史筆
勢難為徒遂令陳生擅料事坐出妙語如
擒俘迹來八法益踈陋雞毛兔毳爭庭除
姓名僅記政自可文采日泯終何如湖陰
丈人古仙伯舊嗜寶刺窺鴻都飄如晴雲
彩鸞舞勁若暖浪寒萼舒丹碑翠碣已冠

世所恨咋舌懷嘉謨
竭來掘筆弄天巧
下視羅趙真
有餘詩成醉墨作
三絕寒室眩
晃生瓊琚

題翠山嗣禪師雜花世界

寶田琪柯天上種
一一五采相紛披
深根清寧出樂國
幻境變滅卑仇池
藥珠駢頭滴膏露
萼綠擁翠攢新枝
陰陽轉旋發天
祕霜雪饕虐培靈
基紫泥分封慶雲
護緹室應律温風
移初疑層臺閬仙
下佞笑移谷愚公
癡側金布地素習
結剪綵眩畫神

光竒桂宮所斧古莫徵
樾源展畫人猶疑
高禪息機月窟坐
微笑彈拍靈山來
嵌空積鐵不受暑
垂溜掛練能成漪
巧翻新好喻空假
妙合頃刻窮施為
溝塍衍平碁局布
巖谷巉削丹泉滋
流鶯弄晴暹繚繞
幽鳥觸影搖參差
扶筇一觀定已駭
飛觥百罰知何辭
眉毛猶存眼非眩
意不落相寧無詞

贈劉醫

行禁架術

君不見東漢趙生試竒術
禁架相傳人莫

測桑皮為脯水為醪耿耿千年猶廟食

事見

後漢趙炳傳今台州土神是也

又不見葛稚川遠窮句漏

思得仙辛勤纂書集竒恠金創一啖完如
前古來長生氣為寶踵息深深神不老肯
將呼吸逐凡庸辛苦徒令顏色槁羨君妙
契合二士萬病相酬一杯水參苓遠棄藥
無功變幻須臾人共喜靈龜枯桑終殞生
鴈以不鳴曾見烹誰言靜默解自致奔走
岐路方喧爭我生守口今已瘖氣涌如山
空苦心漫將寸穎寫竒崛紛紛過眼誰知

音峻層瘦骨非食肉空洞無塵那有俗金
華玉瀝端可餐要俟它年梨棗熟

次韻段惟德右司

空齋病起槐幄深碧雲道士遥相臨問之
不肯說姓字笑指庭鶴知余心昔年種松
在山北咫尺十載脩篁侵公當青春立霄
漢我竟日夕還山陰

子昂風林牧馬圖

駟馬不受人間斲春入川原草如髮老髯
背面心已知眼底玄黃總凡骨相親柳下

那作踈泯默此意今為圖竹林之賢固竒
士晚歲絕交真可吁

張氏女

七歲能
大書

皎皎嬌女眉髮鮮筆墨為耒書為田家貧
畫地當縑楮能使平陸生雲煙老蛟翻波
注甘澍渴驥齧檉迨寒泉躍如斫陣勢揮
突快若舞劍光回旋青燈阿翁夜授詩誦
聲出屋清且圓天然異質世外寶寸穎入
手真如椽流紅題詩愧飄蕩織錦作字空
纏綿遶床不憂翠袖薄玉雪晃耀躡花鈿

君不聞祝融之峰魏氏女空中落筆垂瓊
篇閉門養姑吳彩鸞一謫人世知何年道
合變化難具言宿習妙解寧非仙

送儀上人歸天台

三百六旬塵浩浩萬八千丈雲飄飄手提
飛錫絕江去獨飲古澗長生瓢乳彪呼風
小兒語老鶴翫月仙人舞空林桂落招不
來冰歇巖頭斷前路

題李廷弼歸安去思碑

人言歸安之水堪耘耔又言歸安之水宜

繭絲移文夜下鄉社集折竹作度魚鱗推
阿翁裹飯立田所大兒應官入城府篝燈
夜篝尖角羸百畝塗朱費千楮慈仁李長
官眼明不識催租瘢溝塍如枰舊疆理故
王之籍那可毀刮毛龜背羞作腴掉頭據
案難奉符

聖朝阜民極天際山積川量一稊米挂冠
徒步歸即休虛籍誇浮非我計弁山何巘
屹茗溪何潺湲山君水神各有職樂意禽
魚兩相得君不聞古來吏弘羊烹劉晏死

飛蛾赴膏無有已歸安之碑立如玉父老
摩挲路人讀

題董高閑道士春龍行雨圖

清冷之淵玉為寶呼吸銀丸起晴晝昂頭
躍空朝紫京海若蒼黃河伯走積靈為氣
翻帝車坐今日觀生糶糊黃雲離離覆下
地神跡彷彿象今為圖

送錢唐萬戶還鎮

秋風八月錢唐潮三千組練平明驍吳王
故宮草凝碧一塔突兀凌霄將軍宣威

立油幕手撚羽箭調青鷗穿空盤旋彩雲
墮藉草燔炙羞肝骨酒酣意氣擊玉斗垂
手逞舞花容嬌百年繁華等流水金谷翠
樹隨塵消平湖堤柳千萬縷時繫落日傳
笙簫宴安侈習卒未盡癡兒騃女猶喧佻
名王之孫古英武韜鈴夜誦聽寒刁徒兵
畫閱逐奔馬舟師夜渡追輕舸坐令長城
鎮南服鱷鯢落膽夷茲妖煌煌輿圖久橐
戢紫燕九陌嘶風騎骨中武庫貴商略談
笑橫梨真雄超丹書之功在金匱願趾世

嫩輝 皇朝

嗣天師墨竹

玄雲空飛着無跡
濃淡晴溪護寒碧
碌碌玉石圓且竒
古澗因依養顏色
僊人紫宮朝未移
平安日報春熙熙
生綃陳情寫初意
為問白鶴來何遲

送趙簿正卿歸養朮城

淵明投憤酒初熟
弘景挂冠丹始成
何如奉輿歸故里
夜聽慈竹平安聲
食蓮分甘舍雲冷
得魚入饌泉水平
清門前槐柳綠陰

直會有雙鶴飛來迎

送保寧萬戶出鎮

古閬州

鷓樹飄紅蜀帝飛
錦屏橫空十二眉
天狼夜沉北斗正
筆花列陣書成圍
拾遺舊題山鬼嘯
文石縱橫碧苔燒
將軍好文歌太平
桂酒謹迎梓潼廟

子昂寒篠枯槎圖

靈柯連蜷排石角
海風吹秋折繁萼
亭亭明玕左右從
呼吸玄雲起陰壑
猛思誓欲窺河源
後者亦返清泠淵
河源露重星差

我清冷之淵多蛟鼉上天下天意沉惻化
作蒼龍張素壁玉堂之僊墨成沼穎脫淋
漓翻浩漾鐵榦飛光明月流翠節參差飄
窈窕昂身突兀太古春崢嶸赤立驚絕人
支頤觀象洞玄化芳朽成歲非吾真

澧州通濟橋

洞庭水發波湯湯老蛟挾舟恣低昂何人
空中化樓閣斷鼇為石虹為梁澧陽太守
默無語朱墨塵深失修舉萬里南來春未
歸離家想爾曾題柱

近有善書僧曰溫妙明溫華亭人
明眉山人也余嘗識明于玉几山
其年未四十溫老矣余識于靈隱
視其書之高下亦類夫年也閏十
月有僧携明書示余遂各為一章
美之且記二子之出處焉

老溫作書誰授訣少學潘郎繞城帖興來
掘筆弄春妍靄靄芳叢開飛蝶平生大字
顏魯公晚復顛放少露鋒論功古法雖未
至瀟灑要是僧中雄醉裏蒲萄墨為骨秋

葉東西雲鬱勃裹縉急點數玄珠不識公
卿是何物只今書畫名已傳華亭鶴唳悲
流年西方金仙在何天寄聲為了塵中緣

其二

蜀明貌癯肩聳山我與之語清且閑聞其
作書誠險艱自制美筆出袖間流落金題
入清笈魚鑰無聲帳中閱暎水寒尊凝素
波側石枯藤挂斜月西風玉几雲翩翩黃
衣渡江聽清猿逢人醉寫數十紙山僧示
我相誇傳歐陽父子病骨立誠懸繼之天

為泣楚優抵掌真偶然妙解無言君合識
善之攜酒招游西湖值雷雨今韻

得杯字

南山樹影糊輕煤北山雲花玉崔嵬絕憐
我輩少姿媚幻此異景窮竒瑰湖光山色
兩愁絕更挾新雨除飛埃千年龍公睡忽
醒頃刻駕浪鞭春雷我生倦游端有意陳
迹黯淡漫蒼苔擬將鐵笛寫清怨復恐翠
袖含餘哀主人侶恠不解樂故結勝侶攜
樽壘翩翩六鶴舞晴翻華表清唳雲光開

絕憐山雞強聯翼照水寒影空徘徊謝公
履齒殊濟勝偈不蓬宇徒低摧娟娟新青
故堤柳片片輕白孤山梅春風佳游詎易
得相與一笑同銜杯

賦金華方君雙魚硯

海上鯨魚雙鬣紅振鬣直上嫦娥宮侶嫌
嫦娥太孤絕耿耿冰雪難為容須臾海枯
不可下駢頭躍入空巖罅翠藤交絡石罅
深太古風雷催變化得意相忘睡酣熟開
眼重光弄蛾綠跣銀破練何足奇共飽雲

腴作寒玉良工感此同死生冥搜巧琢存
其形世人翕霍漫列頸對此三挹顏為頰
玄英間孫古俠士脫粟論交傾意氣竭來
風雨泊江干拂拭雙魚落清淚平生謝子
金石交詩魂寐歷飄黃茆此中濡毫作新
誌免與俗子同譏朝

寄張伯雨道士兼簡鄧慶長二首

寢扉曉入香爐雲尸坐朝日雙臉醺南山
鐘磬侶有約北山禽鳥如相聞楊枝低昂
碧霞袖藕葉清淺青霓裙更欲深居入林

清容居士集卷六
三
壑築壇夜禮三茅君
越羅作衫花纂纂今年身長覺衣短垂虹
大堤迎棹船綵袖翩躚酒卮暖還家閉門
百不知桐葉題詩綠陰滿鄰坊為約張隱
居細雨湖橋乘款段

清容居士集卷第六

開

u a u a

清容居士集卷第七

古詩七言

煮茶圖 并序

煮茶圖一卷髣石窓史處州燕居故事
所作也石窓諱文卿字景賢外高祖忠
定王曾孫儀觀清朗超然綺紈之習聚
四方竒石築堂曰山澤居而自號曰石
窓山樵此圖左列圖卷比束如玉筍錦
繡間錯旁有一童出囊琴拂塵以俟命
右橫重屏石窓手執烏絲欄書展翫疑

有所構思屏後一几設茶器數十一童
偃背運碾綠塵滿巾一童篝火候湯蹙
脣望鼎口若懼主人將索者如意塵尾
巾壺硯紙皆纖悉整具羽衣烏巾玉色
絢起望之真飛僊人予意永和諸賢放
浪泉石當不過是而其泊然宦意翰墨
清灑誠足以方駕而無愧甲午冬十月
其孫公疇出以相示因記而賦之以發
千古之遠想云

石窓山樵晉公子獨鶴蕭蕭煙竹裏月湖

一頃碧琉璃高築虛堂水中汀堂深六月
生涼秋萬柄風搖紅旖旎遵南更有山澤
居四面晴峰插天倚憶昔王門豪盛時甲
族丁黃總朱紫曉趨黃閣袖香塵俯首脂
韋希雋美一官遠去長安門德色欣欣對
妻子豈如高懷脫榮辱妙出清言洗紈綺
郡符一試不挂意岸幘看雲卧林壑平生
嗜茗茗有癖古井汲泉和石髓風回翠碾
落晴花湯響雲鐺袞珠藥齒寒意冷復三
咽萬事無言歸坎止何人丹青悟天巧落

筆毫芒研妙理黃梁初炊夢未古舊事淒
零誰復紀展圖縹眇憶遺蹤玉珮珊珊響
秋水

贈張玉田

循王五世孫
來鄞設卜肆

將軍金甲明如日勒馬橋邊清警蹕淮壩
徹衛羽書沈置酒行宮功第一蟬冠熊軾
填高門英英玉照稱聞孫張鎡號約齋
堂名玉照百
年文物意未盡玉田公子尤超群紫簫吹
殘江水立野雉驚塵暗原隰夜攀雪柳踏
河冰竟上燕臺論得失丈夫未遇空遠遊

秋風淅瀝銷征裘
翩然騎鶴歸海上
一笑相問誇綢繆
兩曜奔飛互朝夕
璇府森芒蠡莫測
要須畫紙為君聽
落筆雌黃期破的
壺中白日常高懸
道逢落魄呼醉眠
清歌停雲意慘淡
倚聲更度飛龍篇

題子昂浴馬圖

首着原空雪新積
群馬飢鳴渡江食
大梁公子心未平
一匹宛駒萬夫敵
圍人初浴意氣增
跨轡已晚知無成
雲窓徘徊悄無語
掩卷索索猶風生

送倪德進歸番易

書眸的的垂玄珠
辯口落落傾冰壺
寶刀挂壁指閭闔
闔扁舟挾浪辭東吳
低昂黍禾故流道
隱沒桑棗遺宮墟
仰看浮雲勿復語
俯視逝水誰為圖
天衢晴塵接冠蓋
石室古簡搜盤盂
大宜置身並班馬
小却論事追唐虞
懸知擔簦要有得
永愧折簡終難呼
深春無人碧桃靜
落月在屋冥鴻俱
歌聲清琅振金石
筆意橫逸搖璜琚
苦心寧為爨下木
怙首不作轅中駒
牛毛取士

固當走魚目眩世徒爭姝平原飛埃宿麥
盡長河奔潦柔桑枯還家勿陳賈生策閉
戶趣著神農書相思我亦返屠肆靜念子
豈淹田廬

送僧德芬過松江

海門山人捐竹杖笑指飛濤挾雙槩雲間
鶴唳耳不聞洞下龍歸夢猶想我聞諸天
亦官府一息塵寰總調御黃花滿院人跡
稀霜月離離在前戶

憶陳道士

空巖羽人氣為祖玉立秋空振玄古酒酣
高嘯裂行雲直上釣天聽漢武白雲一去
誰遺情掉首不問人間名當時雙瞳傲餘
子猶有翰墨傳孤清紫綸交馳丹闕下人
道山中多僕射黃金蛻骨碧藤深夜半寒
光明月價飛鳧縹眇山鬼靈蕙殺一薦端
貴誠欲從桂父乞僊露虛牝田激笙竽聲

病馬圖

青絲屈曲長安道卓午歸來廐中老側身
仰天思遠遊口不能言顏色悄奚官却立

深有疑侶言非病那用醫願乘長風迅絕
足一息八極歸瑤池

次韻張伯雨梅花島

雲屏油幕低覆垂晴日倒映黃琉璃孤根
自有巖壑趣屈曲緹室情依依魏莪青女
來藥珠赤脚獨立層冰渠燧人當陽朝寶
鑑金胥族陋催銅壺何人曾中藏九島內
火迴環不知曉咄嗟已辨天機深頃刻能
成化工少陰陽在手司帝春坐窓更試明
窓塵江湖遠涉汝良苦門外萬竅笙竽吟

次韻渭川春玉圖二首

至人虛心實其腹手種琅玕如種玉晴雲
散墨春思浮咫尺經營千畝足清標亭亭
儼矜絜笑脫斑斕賜膏沐揚旌植纛神君
遊萬籟無聲江水淥此君之志那可量榮
辱相忘在空谷大冝蓬萊之三山小冝武
夷之九曲前如綺園歌紫芝後若夷齊侍
孤竹隕麋之墨清且竒脫落玄黃乃真目
幽齋尸居耿相對有客叩門深絕俗天空
日沈碧雲湛細酌寒泉毫秋菊夢迴倚杖

森在廷燁燁雙瞳鬢深綠

瑤林群僊歌捧腹解帶蘭皋捐佩玉深知
五采眩空花守墨空巖思濯足層冰急雪
成九轉重露輕煙方一沐湘君寶瑟調初
絕唯見遙峰蘸寒淥長空旋宮起萬籟翠
袖無言守山谷紛紛落葉漫渭水耿耿殘
花守韋曲論功歲晚端有意深愧群英不
如竹森然壁立聯堵墻變化淋漓傾衆目
高人宴坐不出門一榻常懸謝囂俗每令
此君當上坐末席餘清友松菊回首故園

新雨晴無盡春風吹草綠

忍怒堂

大都袁氏

汝南堂堂卧雪翁飲寒閉戶稱高風吳相
亡何不知止二石醇醪能脫死吾宗高標
兩都史餘子紛紛那足比人生遇事何強
嗔百年歲月籠中身水清之魚鉤蒲餌白
鶴出林紅鶴忌君家兄弟如聯珠熟視不
語疑模糊連理之木多慈烏大兒拱立群
雛趨家僮大勝千木奴冬園芋栗夏芙蓉
壺有美酒架有書不識喜愠真何如門前

駟馬填華裾

飛鴻軒

新安胡則大

冥冥天機衝紫霄
炎洲雪嶺窮遊遨
鷦鷯一枝掩目避
始信懷土非吾曹
勞生貴賤各有適
攘臂何人限南北
三足之鳥今不停
寒暑周迴短長刻

李士弘枯木風竹圖

為玉隆陳又新作

狂蛟舞空蒼髯拏
雙鐵蒙頂雲交加
亭亭霜標不受侮
慘澹天籟扶槎牙
西山古淵人莫測
一柱承天萬牛力
會須截玉化陂

龍拂拭苔光遺劍跡

題茅山道士雪梅障

積金峰頭雲五采天女行空散珠琲為憐
絕壑一枝春玄墨敷調增蓓蕾因風飄零
顏愈真竟日霾藏氣逾倍油燾紛紛成素
旄積鐵離離增練鎧坳如側杯頰承露亂
若銛刀續剪綵雙龍挾鞞擬欲上萬馬飛
塵卒難浼高齋鍾磬日未暎徙倚橫斜眩
銀海憶昔西湖極遊歷真與逋仙澆鬼磊
後知色相端有空百念灰心付真宰我我

茅君儼不死秦帝嘉平年
首亥精思萬林元炁存衆卉
群芳羞皚皚閉門緹襲坐蒲
團長恐夜深風雨改

廣信奚君靜能家鵝湖以太府掾
出補南康簿予慕其仕止皆武夷
先生講道之地叙言其異同幾於
贅因成長句亦欲知夫先賢箴警
非二途近世學者駸駸虛玄則知
武夷晚年持守之論非矯可不慎
諸

鵝湖盡日鐘磬清不聞昔時絃誦聲愛君
卜居在其側編簡插架猶談經當年群公
水蒼珮粲粲寒芒德星會投壺雅爭非世
情餘子承風增毀背康廬招提無極篇希
夷入道從茲傳百年脣吻互朝鄙經緯妙
密同先天兩地斯文實元氣宦遊家居總
竒事稽古紛綸三萬言顏生屢空心晏然
次韻王道士丘真人弟子其韻不
雅馴姑答其意
潭潭古僊浮玉顏憫世壯志金城堅丹霞
紫壁接霄漢過客吊古猶思賢王君碧瞳

水蒼珮深恨望諸書絕燕丘公蟬蛻七真
化青史誰能繼二班

送馬季權之官平江州

碧梧丞
相兄子

咸淳十載兵塵高漢江之水纔容舳舻
太傅亂天緯擢船兩翼鳴春濤中書蛛絲
守空印片紙除書魚貫進相府門前青草
深破席踈簾雙白鬚扁舟疾走歸番江百
城破竹爭迎降紛紛成敗付野史玩芳孽
卧唯軒窓往事淒迷踰四紀華屋空梁歸
逝水洞庭木葉三閭愁淮南桂叢八公死

京城即今相避迨傾蓋忘年總論舊潁州
推官家譜傳岳陽樓頭水浮天

宋誠甫押送交趾使之武昌

飄飄蒼珮乘風來下視漢水如浮杯坡陁
環堤舊亭障鐵笛穿石聲崔嵬武昌之魚
不可食昔人作歌何寂歷隔江小城大如
斗枉使邊軍暖鋒鏑古來相傳用武地今
作薇垣鎮官吏猩血繁纓金齒來犀皮屬
甲雕題至碧瓦門深鼓角高羅庭椎髻聲
嗷嘈銀甕蒲萄雲葉重錦韁叱撥風花驕

深知王臣有竒筭蠻使低頭輸密款勸君
莫登黃鶴樓勸君莫停鸚鵡洲黃鶴之人
白雲杳鸚鵡之客蒼煙愁愛君手中青鏤
筆能寫牙籤三萬帙迄今舊史難整齊屢
屈先皇詔頻出玉堂日正槐影長汗青之
簡光熒煌請君直書亡國事還作觀風窠
字記

送濮陽陳景臯之官忻州

陳侯直氣摩青雲天馬脫駕羞駑群毳袍
昌言高坐聳餘子俛首卑塵氛探囊竒策

得要領炙轂妙語通氤氲京城久居閱冠
蓋酒觴綦局忘昏昕平生植竹嗜好古膏
沐服食童顏醺往年濟陰試敏手桑柘戢
戢春田耘政成烏府考上上擊鮮釀秫歸
榆粉窮冬邂逅色骭髀近錫符竹州名忻
自宜骨鯁任獻納或佐輦轂輸忠勤群公
歎息各賦詠跋馬操袂愁離分緬思河東
舊雄鎮甲騎出塞宵踰汾即今樓臺歌響
集棗下纂纂紛紅裙愛君胷中人物論發
研破的無虛文蓋公之堂本清淨解帶卧

治叔奇勲此君相從匪朝夕晝簾煮茗看
鑪熏

送湯道士降香武當山

紫衣山人眼如月朝捧天香辭鳳闕柳絲
輕拂桃花驄屈曲層巒過俊鶻澗中黃銀
如僕姑清淺閃爍隨菖蒲水流東南天轉
北橐籥妙化誰為圖沉沉玄帝道淵默手
握神機合無極密調六氣佐璇璣魑魅潛
藏百神職暮春之初傳降靈閱世已久難
稽評龍虎之章端莫測龜蛇之光杳無跡

過高郵湖

七十二湖春浪濃
風刀剪霰跳玲瓏
參差凍柳皂纛重
偃首俟命朝珠宮
淮南田父身龍鍾
灼龜瀝酒占年豐
舊秋積水挾豐隆
長魚揚鬐蒲蕩中
桑顛高下棲冥鴻
黑禾生耳隨飛蓬
瓢囊扶携出城東

至治天子達四聰
詔書寬大蠲民農
秀麥奉奉翠織葺
赫日出海扶桑紅
歲熟於酉年相逢
擊壤鼓腹歌時雍
展牲美報湖神功

趙昌荷花

我家東湖三百頃，瑞錦縱橫綠雲凝。森森
曉氣天香飛，星斗光沈水花淨。遠如嬰兒
脫文縵，近若胎僊臨玉鏡。瓊杯欲側兩絲
垂，金掌初調露珠定。盡將機心付鷗鷺，小
雨輕煙穿短艇。京塵烏帽二十年，夢入滄
洲寄清興。趙生畫意不畫格，淺粉輕砂養
真性。韜精斂容羞自陳，三沐無言月華靚。
邇來馮於號能事，老嫩風晴毫髮證。玄黃
已辨神俊枯，逐影之人道中病。高堂視此

青琉璃香色俱忘保清靜

京尹旌門

泰山之溜石可穿磨磚為鏡不問年人生
作事貴苦堅砥節厲行通蒼天武清之祠
世所傳出門重趼神已憐五里一垓拜漸
前寶鑑當曾起霏煙念我母疾醫難痊帝
叱二豎沉諸淵秀眉鶴髮人中僊伯仲叔
季舞蹁躑脩齡已盡銜苦冤烏傷栢慘羅
墓田劉愷丁鴻孰為賢煌煌神州風化先
槐柳表道綽楔懸楮紳交喜聯序篇太史

屬筆慙非椽

乘鸞吹簫圖

繆公荒淫亂天紀
纍纍宮中四十子
懷羸復作重耳妻
匹盪相揮國深耻
娉婷弄玉誰復看
參差窈窕能合歡
築臺虛聲出天外
詐言後夜同乘鸞
人言神僊能不死
橐泉之墳露遺址
哀哀黃鳥飛復來
良藥刀圭竟誰致
高辛之女隨盤瓠
漢愁匈奴遣公主
一身能解百城圍
鄙計咿嘍笑千古
天台之事尤荒唐
唐劉郎阮郎歸
洞房石橋

雲深樛木骨披圖相看儼同傳

雲岡圖為王叔能作

白雲晃晃虛飄飄群峰磊砢通危橋蒼髯
側挂截地脉素練直下來山腰是中樓閣
誰所居翠篁高拂寒光遙憑虛望遠意莫
盡振衣獨立搏扶搖王侯出守山水郡逞
懷盤礴窮清寥一日不見輒憤憤卧遊想
像歸生綃信知俗子謝不去濟勝有具難
為招

贈吳江宗尉

太湖三萬六千頃
穉秋風政相並
吳船蹴擲如飛梭
鳧鴈參差白雲影
連年田舍無炊煙
吳船出沒平湖前
縣官打衙入湖去
弓刀夾棹魚升天
元憲之孫為少府
岸幘看山揮玉麈
飛蝗避境虎渡河
吳船雖多柰我何

與相士王月屋

世途紛紛黑如漆
暗中摸索端有術
何人竊藥廣寒宮
碧眼淋漓論得失
麀頭之子藍且醜
牙籌夜深鬼神守
麟臺功次不論

渠當道相逢須疾走

廬陵梁醫濟生堂

上池之水人莫識三揖東華借餘瀝瞳光
透碧千里懸二豎蒼黃離衽席南康昔有
劉神醫鶴骨變化芝朮肥入門逆意望且
走吾今見子同其機

次韻史允叟檜屏

蒼雲之根百歲植巧匠屈曲空揉蟠淨如
翡翠立亭下矯若么鳳依闌干崢嶸要使
頭角出鞭霆駕電超雲端扶春萬條豈不

好猥瑣籬落迎霜殘君不見姚江參天兩
雙檜至今風雨之夜猶清寒

越王尉餘姚嘗植雙檜於尉治

次韻蔣遠靜

蔣氏祖五代末與僧為友僧落魄乞食市中六七兒常負囊從之
一日與蔣浴江中視其背有目
蔣驚異是日僧化去迺彌勒也
留布囊與別且云蔣氏子孫當代有進士

唾壺塵尾手所持白眼對客客不知出門
俗子多敗意三語之掾真吾師曉窻新沐
綠陰淨碧雲竒峯生九疑隔隣書聲入幽
耳茶甌散花酒浮蟻百年行樂在適意燕

額頭顱空萬里君不見燕山俠客多苦寒
出門悲歌來日難

同龕彌勒誰總持沙上偶坐忘所知布囊
相傳陋七葉密記端是人天師愛君清言
漱金石酒酣硬語輕丞疑亦知造物端戲
耳一室尸居旋磨蟻東鄰花發西鄰歌咫
尺相思隔千里陳郎之約不可寒我眠卿
去人所難

廬江羊孝子兵難時兄弟三人與
其母被掠為奴後廿年復得完聚

郡表其閭

君不見觀津竇廣國傳舍沐頭深記憶時
來徒步入長安握手相看淚如滴又不見
杜羔孝感為尚書兵前失母長歎歔一朝
老嫗忽邂逅郎君玉貌猶吾夫淮源鐵騎
排雲來戰骨積雪飛寒灰小兒纍纍繫馬
尾鬼妾赤脚驅車迴黃塵漲空日將暮母
子弟兄不知處只今總是太平民那識當
年亂離苦人言缺月定有圓馬能生角石
可穿亭亭高門拱槐柳更灑鴻筆傳青編

潘容居士集卷七
送潘元卿績溪邑諭

君不聞黃山種松法纍纍如珠齒如髮十
年拱把百年梁華表相看化鑿魄又不聞
婺源之山高入雲黃流夜作河漢奔醜渠
漩渦濟川具怙首萬折歸天門魯中之壁
神所惜龍馬成圖帝為錫韋編索隱年益
耆此道誰言深默得紫陽老人心曾高番
髮執簡窮秋毫即今羣經束高閣上擬混
沌中唐堯拱手臯比立環堵哆口紛紛角
門戶君看黃山之松婺源水師友根源政

相侶

次韻黃松瀑自廣信見寄

開元天子書石經雉頭焚却邊宇寧合宮
宗祀廣致敬底用物馬登云亭林林碑臺
刻新出嘉禧殿前稱第一小臣捧

詔渡江南蠶尾渠眉耀晴日裝成分賜諸
王宮餘墨淋漓遍孤棘古文偽出今文訛
斷簡誰能究佔畢黃僊盡日鉛槧忙語言
冰雪容堂堂明時孝治邁千古願借鴻筆

歌陶唐

時奉旨刻八分孝經

題黃居寀蒼鷹擊雉圖

坡陁肅秋塵四起逆風雉飛疾如矢蒼鷹
矯矯凌空來注目穿胃紅披靡山雌箴頭
入荒篠回視其雄端一死玄雲摩盪寒光
浮側身翻雲轉輪翅急如冠軍赴猛敵緩
若計士箴深智蜀山魏高翠周匝狹徑交
衢不容駟黃生養之愛神俊勇氣縱橫怒
盈嗔想當落筆望平坂回首當關真劇戲
君不聞箕裘可學端有傳諸孫射生養殘
年黃筌養鷹學畫鷹諸孫皆成獵師

送廬陵陳存道赴廣州教授

君不見端平崔相國竹杖角巾老辭蜀清
名高節耀千古寒菊孤香出林谷又不見
咸淳張狀元落落大對三千言流離抱忠
葬魚腹要使名字傳遺編即今聲教震南
朔此州文獻端磊落荔枝一色紅雲蒸菖
蒲九節清溪明當年中州人物論風度曲
江之公唐帝顧吳儂僮父互譏評坐使官
曹異銓注吾聞八桂山峯如玉簪衣冠之
氣連青雲穹龜負碑百神拱色羊跨乘群

清客居士集卷七
六
僊尊翩翩陳子天都客萬舞充庭考金石
笑觀滄海陋浮漚鵬飛暫作天池息

送毛道士降香嵩衡淮海

我所思兮在嵩嶽神清之洞何駭愕參差
弄月秋氣高王子飄飄醉騎鶴少室山人
蕙帳空君今駿馬凌春風山中齊聲呼萬
歲我欲同君學蟬蛻

我所思兮在衡山重華玉珮聲珊珊芙蓉
石床秋水冷木葉飛燈光耿耿軒轅道士
人不識澗底拾薪鑛白石我欲與君上九

疑萬民樂康明聖時

我所思兮在桐栢寥寥帝鄉今莫識潛流
倒注平淮成天塹曾為萬人敵金龍護簡
帝令森蜥蜴俛首穹龜沈我欲與君探其
底五兵長藁樂平世

我所思兮在南海鐵網珊瑚援手採沈沈
雲氣方壺深絳節神君侶相待海中颺母
方頑癡朱書短扎能捕之此中竒觀通扶
搖吾欲與君觀沃焦

贈番易劉生振

我欲贈君珊瑚枝君言不如貽我雜組韉
我欲贈君懸黎珠君言不如貽我盤盂書
長衢飛塵日卓午觸暑東遊角江滸目光
陸離衝紙背徑上河源窮織女龍圖龜書
杳無跡弄丸冥搜矢穿的空林看天無底
青虛室生雲十分白幽蘭叢深不當戶盤
露凝膏敵瓊醕泰山積溜石可消鐵硯玄
花散晴乳林林白袍校詞藝鷓鴣淬鋒儼
初礪身同蝶化入寥天欲伴飛僊更斫桂
彤庭會弁開祥雲河口真天人昂昂

曾中治安策慎勿謾與深彌綸萬里之行
生足下黃河層湍及奔馬參差柳色暗皇
州龍榜高懸動朝野

句曲山迎真送真詞二章

往歲在翰苑嘗草三茅君制書
近張伯雨道士寄示陸魯望句

曲山朝真辭二章蓋每歲大茅
君十二月二日相傳縣天台歸

茅山春三月十八日復歸魯望
所製迺十二月而三月獨缺予

不揆用韻以補後章繹繹字書
即繹字古率字作率呂道士過

三茅因書以寄且為異日朝真
之資伯雨詞氣清簡必以子言

為陋也

清客居士集卷七
參差窈窕行雲急翠旌飄飄露華濕神君
夷猶疑未來矯首精思各山立瑤臺章徹
星斗冷碧扉丹透紅流影春雷迸壑人不
知獨鶴眠松已先醒

右迎真

妙顏朝迴寶衣解乘龍高駝賦遶邁山中
老人年送迎一酌寒泉過玉瀼翠氣紛霏
森孔蓋挾以流鈴光繹繹帝子高歌歸去
來白月追雲送飛珮

右送真

龜蒙詩云九華磨答寒泉急十絕幅搖
翠微濕司命旂未下來焚香抱簡疑
神立殘星下照霓裳冷缺月纔分鶴輪
影空洞靈華發一聲春來萬壑煙花醒
縈雲鳳髻飄然解玉鉞玄竽儼先邁朝
真弟子悄無言再拜碧杯添沆瀣火鈴
跳躍龍毛蓋腦髮青青赧緯緯萬
象消沉一瞬間空餘月外聞殘珮

贈呂與之

碧窓獨對中秋月
侶怪腦華雪霜白
瘦筇直上大茅峰
長吟冥思啓玄籥
綠蘿丹騰紅欲走
我欲拾之難在手
嗇精超形朝紫宮
下視塵寰等蒼狗

送瞿伯器還吳

輕鷗不受機心縛良馬端隨敏手馳鄞江
井邑十萬竈簿領積几窮緒披瞿君坐曹
談笑決長官驚誇里閭說豈惟煮茗挹清
風復解停杯問明月澄江雪浪催歸舟洞
簫聲咽行雲留明時掄材在濟用佇看公
府交章酬

竹素園

緗帙不作飛白體漆簡端徵殺青書哀哉
瀛王兔園冊自比稷禹今何如陳生歌聲
夜漫漫手織雲錦餐琅玕丈夫書功夙有

顛蕩節束帛光丘樊

松聲樓

層樓突兀觀芸芸萬籟沈寥天地分初如
盤車出層巘宛若幽磬穿孤雲上方禪寂
念不起但見白鶴來繽紛金鐘風篁儼相
答有客掩耳元無聞

阮受益携郭功父杏山詩來求題
迺知為名門所作因次韻

葛翁迎曦侍東皇笑指梅根之陽岡手揮
桃李植文杏春至古澗流紅香杏華飛時

爛林谷錦繡為天漫翠木即今不識空陂
龍猶指當年舊乘鹿紛紛機事危黃間彼
艾之植誰猗蘭青松迴風太古籟移居之
老時回環兩曜跽丸今幾載阮氏隱居端
儼在金章紫綬先譜承鴈塔龍門耳孫待
翩翩俊翮海門山我欲挾之周九寰精思
義皇粹六籍迄願閉戶窮鉛丹支辭濫說
眩嫫母正色危坐當前顏神僊之說不可
學月窟謹視環中環

送林以道歸括蒼

書生作官端作勞撫拾歲月如聚毛行年
六十甫墨綬又見納祿還林臯磻溪之翁
誠有道采芝妙顏夸不老明時貪賢在壽
俊未信吾徒竟衰槁君家周官擅彌綸經
緯表裏通天人那能望塵拜太守振衣黑
髮前旒陳松花霏霏散黃霧春盡還家美
無度篝燈讀書目光曙承明之廬我當佇

題明皇擊梧圖

胡兒手持玉環侍君側睥睨阿環非一夕
宮中秋葉奏清商笑擊孫枝工按抑嶧陽

清容居士集卷第七
三
之材雲門曲能使薰風生衆綠如何促召
羯鼓催鬧紫妖紅看不足馬嵬坡下催進
程琅璫檀板悲霖鈴緬思康衢擊壤叟帶
索行歌不知老

清容居士集卷第七

開化圖書館

Kaichua library



開化圖書館

Kaichua library

禮

開化圖書館

Kaishua Library

開化圖書館

kaikwa library

Blue Cyan Green Yellow Red Magenta White 3/Color

© The Tiffen Company, 2007

TIFFEN Color Control Patches

Centimetres

1 2 3 4 5 6 7 8 9 10 11 12 13 14 15 16 17
1 2 3 4 5 6 7


清
容
居
士
集

三

開化圖書館
Kaitwa Library

開化圖書

kaikwa library



TIFFEN Color Control Patches

© The Tiffen Company, 2007

Blue

Cyan

Green

Yellow

Red

Magenta

White

3/Color